

國

朝

文

匯

國朝文匯甲前集目錄

卷十九

孫永祚字子長號雪居江南常熟人前明貢生

陟瞻亭記

馮定遠詩序

顧祖禹字景范江蘇無錫人僑居常熟

讀史方輿紀要總序一

總序二

總序三

北直方輿紀要序

南直方輿紀要序

賀國瑞字瑞若號天山江蘇丹陽人諸生

壬子集自序

送解東籬南歸序

仲允葵忱先生傳

十一 十 十 七 六 五 四 三 一 一

國朝文匯

卷十九

國學扶輪社印

張

貢一名貢孫字祖明號蟻虎浙江錢塘人前明貢生有白雲集

策畧五

十三

董文友文集序

十三

獄卒張道傳

十四

唐

靖字開宣浙江武靖原人有前漢集

秦論

十五

魏公叔座論

十六

吳越王錢俶論

十七

徐掌文傳

十八

吳伯玉傳

十八

梁孝子傳

十九

節孝女曹六姑傳

二十

許

楚字方城安徽歙縣人諸生有青巖文集

披雲山記

二十二

遊靈山記

二十二

義烈黃公傳

二十三

太學韶石吳君傳

二十三

周拱辰

字孟侯浙江桐鄉人貢生

義烈吳重光傳

二十五

桐鄉諸節婦贊

二十五

徐

晟

字頌起一字曾銘江蘇長洲人

侍郎徐公傳

二十七

霍山教諭龔先生傳

二十七

王鳴雷

字震生一字東村廣東番禺人諸生有王中祕文集

翁烈婦俞氏傳

二十九

僮者張三愛傳

二十九

潘爾愛

字友龍吳江北麻人明諸生寓居烏程南潯鎮著有涉江草及潯溪文獻

潯溪文獻序

三十一

國朝文匯甲前集卷十九

陟瞻亭記

孫永祚

辛丑七月之七日。儀部蔣公南陔。攜觴虞山之椒。新構陟瞻亭。成。亭在乾元宮旁。長興李侯祠之前。偏蔣之始祖避難渡江。紅巾賊奄至。隱匿廟下。陰翼蔽之而脫。今世為蔣氏香火云。其始末之詳。南陔自有記。而屬予記斯亭。因與登亭而望東北。則江初入海。黃流拍天。一綫若衣帶。隔江五狼列峙。如海上三神山。隱見滅沒於煙濤之外。南則姑蘇諸鄧尉靈巖陽山。為砥為銳。為髻鬟為箭闕。舒青縈翠。百里而遙。若在几席。西北則山脈從江陰蜿蜒而來。昂首城內。雉堞繚之。而亭適當其右。出萬木之末。下瞰昆尚兩湖。沐日浴月。如夾明鏡。簷際達觀亭。矗起與城東兩浮圖參對。鈴聲互應。瑞氣相接。形家所謂馬生角也。縣之譙樓。學之宮殿。寺宇之參差。萬家之屋瓦鱗比。顯顯不遺毫髮。南陔時舒眺於此。也清風。餞落月。日出而海霧開。而晦而山雲翳。光景萬變。頃刻異狀。從麓循磴。不越數級。而勝態之可挹攬如此。嘗試與策杖行遊。弔仲雍之高風。悲齊女之思慕。下則言吳公藏衣冠之兆域焉。西顧道宮仙觀。前後環列。而廢興有時。僅存遺構。因慨然而念虞山之所以名。吳公之所以謚。獨是讓德學道之幽光。雖指點於荒煙蔓草之中。而名與天地俱不朽。固知在此

不在彼也。雖然儀部公一登陟而不忘先人之思。今息影山阿。無詩人屹岵之役。而封公暨太夫人墓木已拱。猶然高岡白雲。時時在目。且念祖德而拓神祠。將馮依神烈。永寄孝思者。於是焉在其與牛山之涕。峴首之哀。戀生前之長在。冀死後之有知者。不亦異哉。此孝子明發之志。又不獨留連光景之詞而已也。是為記。

馮定遠詩序

余少與里中馮已蒼遊。得侍其尊人嗣宗先生。通經博古。後學奉為祭酒。而次君定遠。李君彥淵。皆世其家學。英英秀出。兄弟競爽。既而彥淵以抗節死於兵。已蒼以義激死於獄。高才無命。令人有呼憤欲絕之思。而定遠獨孤行一意。歸然靈光。其為人落落寞寞。衣敝履決。不事邊幅。而芸窗雪案。丹鉛夾註。勘讐必精。與人語刺刺不休。似無端緒。而心計強敏。援證今古。穿穴鉤貫。無出其右。意有所觸。善哭如唐衢。而於聲律會心。則又長歌細吟。以為樂。尤喜後生才穎。稱詩者。旁蒐曲引。示以諸家所長。經其指授。皆有巧法。定遠年少於余。而後先同學於師門。稱州交。每與同里錢履之。殷汝若。何士龍。君家已蒼輩。更唱迭和。講求聲病。而定遠之詩律最細。見推儕偶。追數昔遊。五十餘年如一日也。而余與君皆六十外老矣。錢宗伯公既逝。謂知君無如余者。以序言相屬。而余又安能已乎。今之言詩者。人知祖述少陵矣。每見宋人桃少。

陵而宗義山。私心竊怪之為僻。及觀定遠之言曰。詩與風人之義近。而雅頌後之雅。頌鋪陳揚厲。近於賦。而風人之旨。則緣情而作。比興為多。如春之始波。綃縠參差。不必嘈呖。鞞鞫也。如木之始葩。薔華向榮。不必纒紛狼藉也。蓋天地精英之氣。山川綿秀之精。與文人學士之心。相吞吐。而後片言隻句。皆足千古。而命一世。如比物連類。羅鉅釘。而錮性靈。非詩家所貴也。人以為少陵沈鬱頓挫。義山瓌麗綺妍。而不知義山之深詞隱語。其旨更紆曲於少陵。此真風人之極致也。斯言出。足歲俗學之膏肓矣。故其為詩。艷白生香。名言掇秀。命意曲而取致婉。涵旨遠而吐藻芳。予嘗私取其作。藏篋笥。以相吟諷。風流蘊藉。雋永有加。躋義山於少陵。非無以耳。篇章時時散轍。蒐而輯之。得五百餘首。昔人所云不多作。不苟作。汰蕪登英。信可傳也。蓋其淵源於家學。切嗟於師友。而尤杼軸於性情。其國風小雅之倫與。梓成余為叙。傷而述其意如此。庶亦以附於不朽。

讀史方輿紀要總序一

顧祖禹

昔在神禹克平洪水之災。作為禹貢。孔子刪書。列於六經。其並傳者。又有山海經。其詞迂誕。太史公曰。言山川者。斷自禹貢。允矣。自禹以神聖平成天下。傳之子孫。其支庶列為侯伯。其在商頌曰。韋顧既伐。說詩者曰。顧亦桀黨也。嗚呼。桀之暴虐。天下皆知。弁之。顧為同姓國。葛藟相庇。宗社無隕。義也。湯欲傾夏。則不得不先翦顧。顧亡而夏隨之矣。然則顧非黨於桀也。後有棄其宗祀。獻符瑞於仇讐之庭者。是則顧之罪人也。已。自湯伐顧。而顧遂微於商周之世。及漢興。始得姓於江淮之南。蓋少康封少子於會稽。以奉禹祀。至春秋時。越子允常而始大。其子勾踐。遂以其國霸。滅吳而有其地。通盟於上國。又數傳為楚所滅。子孫竄處於江南。各保城邑。自為君長。而海陽侯以滅秦誅項功。分符漢室。五傳侯絕。侯之子孫。皆以顧為姓。保氏族於江南。及吳丞相雍。以功名顯。累傳以降。皆有功德文章。載在史冊。至黃門侍郎野王。則以著述顯於梁陳之際。所著書數百卷。而輿地志尤見重於世。至今學者。猶宗師而俎豆之。由隋唐以迄兩宋。子孫代有名人。而徵君原九於宋端平元年。由臨安辟地梁谿。耕讀於宛溪之上。子孫奉遺命。歷元世。皆隱居不仕。明成化中。徵仕郎允毓始官於朝。曾孫光祿丞大棟。當嘉靖中。好談邊徼利病。躍馬遊塞上。與大司馬靈寶許公論善。

誤次九邊圖說梓行於世。子奉訓大夫文耀萬厯中以光祿大官正奉使九邊。還對條奏甚悉。天子稱善。文耀生郡諸生龍章。早卒。龍章生柔謙。九歲而孤。好讀書。補邑弟子員。深慨科舉之舉不足裨益當世。慨然欲舉一朝之典故。討論成書。年及強仕。而遘魚羊之變。還遁入山。焚筆癡硯。率子祖禹躬耕於虞山之野。久之益窮困。憤懣無聊。得奇疾。將卒。呼小子命之曰。吾家自兩漢以來。稱為吳中文獻。先代所著述。小子可考而知也。士君子遭時不幸。無可表見於世。亦惟有掇拾遺言。網羅舊典。發舒志意。昭示來茲耳。嘗怪明一統志。先達推為善本。然於古今戰守攻取之要。類皆不詳。於山川條列。又復割裂失倫。源流不備。夫以一代之全力。聚諸名臣為之討論。而所存僅僅若此。何怪今之學者。語以封疆形勢。惘惘莫知。一旦出而從政。舉關河天險。委而去之。曾不若藩籬之限門庭之阻哉。先光祿在世廟時。徬徨京邑。爰爰乎有肩背之慮。圖論九邊以風示謀國者。先奉訓當神廟中。四方無虞。以備邊漸弛。伏戎可慮。先事而憂。卒中忌諱。仕不獲振。先文學請纓有志。攬轡無年。及余之身。而四海陸沈。九州騰沸。僅獲保首領具衣冠以從祖父於地下耳。嗟乎。園陵宮闕。城郭山河。儼然在望。而十五國之輻員。三百年之圖籍。試焉淪沒。文獻莫徵。能無悼歎。予死汝其志之。小子匍伏嗚咽而對曰。小子雖不敏。敢放棄今日之所聞。卒一年而祖禹以

疾廢。又三年疾愈。不揣愚陋。思欲遠追禹貢職方之紀。近考春秋歷代之文。旁及裨官野乘之說。參訂百家。續成一書。垂之後世。俾覽者有所考鏡。而貧賤憂戚。雜亂其中。上之不能涉江逾河。登五岳。浮沅湘。探禹穴。窮天下之形勢。次之不能訪求故老。參稽博識。因以盡知天下險易阨塞之處。下之不能備圖志列史乘。不出戶而周知山川城郭里道之詳。惟是孑殘抱閤。寤歎窮廬。吮筆含毫。消磨歲月。庶幾無負先人提命之意。若以語於著作之林。余小子夫何敢。

總序二

客謂顧子曰。子所著方輿紀要一書。集百代之陳言。考諸家之緒論。窮年累月。屹屹不休。至於舟車所經。亦必覽城郭。按山川。稽里道。問關津。以及商旅之子。征戍之夫。或與從容談論。考核異同。子於是書。可謂好之勤。思之篤矣。後有起者。考求險要。辨別攻守。遠而周知天下之故。近而都邑之間。非子之書。何所適從焉。余曰。否。否。不然。古人有言。尺有所短。寸有所長。明於匠石之任者。或昧於雕鏤之細。子也未嘗涉江河。登恒岱。南窮嶺海。北上燕冀。間有涉歷。或拘於往返之程。或困於羈旅之次。不獲放曠優遊。博觀廣詢。間嘗按之圖畫。索之典籍。亦舉一而廢百耳。又或了了於胸中。而身至其地。反若瞢瞢焉。所謂所見異辭。所聞異辭。所傳聞又異辭者。不可勝數也。

予之書其足據乎。且孫子有言。不知山林險阻沮澤之形者。不能行軍。不用鄉導者。不能得地利。夫論兵之妙。莫如孫子。而論地利之妙。亦莫如孫子。使信余之書。而不取信於鄉導。辟之掩耳而求聞。閉目而求見。所誤多矣。且夫地利亦何常之有哉。孟關劍閣。天下之險也。秦人用函關却六國而有餘。迨其末也。扼羣盜而不足。諸葛武侯出劍閣。震秦隴。規三輔。劉禪守劍閣而城都不能保也。故金城湯池。不得其人以守之。曾不及培塿之邱。汎濶之水。得其人即枯木朽株。皆可以為敵難。是故九折之阪。羊腸之徑。不在邛崃之道。太行之山。無景之谿。千尋之壑。不在岷江之峽。洞庭之津。及肩之牆。有時百仞之城。不能過也。漸車之澮。有時天塹之險。不能及也。知求地利於崇山深谷名城大都。而不知地利即在指掌之際。烏足與言地利哉。善乎孫子之言曰。我不欲戰。雖畫地而守之。敵不能與我戰。我欲戰。敵雖高壘深溝。不得不與我戰。然則變化而無窮者。地利也。地利之微。圖不能載。論不能詳。而變化於神明不測之心。所謂可以意會。不可以言傳者乎。故曰方圓奇偶。千秋不易也。伏羲以之畫八卦。大禹以之演九疇。伍兩卒旅。千秋不易也。武侯以之列八陣。李靖以之變六花。城郭山川。千秋不易也。起於西北者。可以并東南。而起於東南者。又未嘗不可以并西北。故曰不變之體。而為百變之用。一定之形。而為無定之準。陰陽無常位。寒暑無

常時險易無常處。知此義者而後可與論方輿。使銖銖而度之寸寸而比之。所失必多矣。吾嘗考叢古之用兵。奇變恍惚。其所出之道。皆師心獨往。所向無前。故其武畧比往古為最高。彼豈嘗求之於山海之圖。里道之志哉。然則求地利於吾書。無乃猶是刻舟之見乎。吾慮舉足動步。或將有礙焉者也。各其益廣所聞。無過恃吾之書也。已。

總序三

或曰。審如子言。鄉導之於地利重矣。然則子之書。其可廢乎。曰。何可廢也。孫子言。不用鄉導者。不能得地利。然不得吾書。亦不可以用鄉導。夫南行之不可以北轅也。東泛之不可以西楫也。此易知也。西北多山。而未嘗無沮洳之地。東南多水。而未嘗無險仄之鄉。此易知而不易知者也。且夫一指蔽前。則泰山不見。十步易輟。則日景不分。使其惘惘焉左臨大澤而不知。前入深谷而不悟。乃欲執途之人而求其為鄉導。其可恃乎哉。何也。鄉導用之於臨時者也。地利知之於平日者也。平日未嘗於九州之形勝。四方之險易。一一辨其大綱。識其條貫。而欲取信於臨時之鄉導。安在不為敵所愚也。是故先知馬陵之險。而後可以定入魏之謀。先知井陘之陋。而後可以決勝趙之計。不然。曹瞞之智。猶惕息於平陽。武侯之明。尚遯回於子午。乃謂求地利於臨時。而不求地利於平日。豈通論哉。是故途有所必由。城有所必攻。此知之於平日。

者也。欲出此途而不僅出此途者，乃善於出此途者也。欲攻此城而不即攻此城者，乃善於攻城者也。此知之於平日而不得不資於臨時者也。攻則攻敵之所不能守，守則守敵之所不能攻。辨要害之處，審緩急之機，奇正斷於胸中，死生變於掌上，因地利之所在而為權衡焉。此固大將之任而非可問之於鄉導者也。凡吾所以用多，用寡，用分，用合，用實，用虛之處，既已灼然知之，而後博求之於鄉導，從其可信，缺其可疑，以善吾地利之用，豈徒寄耳目於僕夫云爾哉？此吾書所以必不可廢也。且不可獨行軍之一端也。天子內撫萬國，外蒞四夷，校幹強弱之分，邊腹重輕之勢，不可以不知也。宰相佐天子以經邦，凡邊方利病之處，兵戎措置之宜，皆不可以不知也。百司庶府為天子綜理民務，則財賦之所出，軍國之所資，皆不可以不知也。監司守令受天子民社之寄，則疆域之盤錯，山澤之藪匿，與夫叫桑水泉之利，民情風俗之理，皆不可以不知也。四民行役往來，凡水陸之所經，險夷趨避之宜，皆不可以不知也。世亂則由此而任折衝，鋤強暴，時平則以此而經邦國，理人民，皆將於吾書有取焉耳。然則孫子之說固未當乎？曰：非也。孫子之言固以地利者行軍之本，而鄉導者地利之助也。先知地利而後可以行軍，以地利行軍而復取資於鄉導，夫然後可以動無不勝。凡吾所以為此書者，亦重望夫世之先知之也，不先知之而以惘然無所適。

從者任天下之事。舉宗廟社稷之重。一旦束手而畀之他人。此先君子所為憤痛呼號扼腕以至於死也。予小子既已奉遺命。採舊聞。旁摭紀載。視之正史。稍成一家之言。合為一十八部。分為百三十卷。藏之家塾。以俟來者。

北直方輿紀要序

據上游之勢。以臨馭六合者。非今日之北直乎。說者曰。昔黃帝邑於涿鹿之阿。幽陵自昔建都地也。太史公曰。學者多稱五帝。然孔子刪書。斷自唐虞。昔舜都幽州。周列燕國。漢唐以來。大都可知也。石晉以燕雲入契丹。耶律德光於晉之天福三年。始號為南京。耶律隆緒又於宋之祥符五年。改為燕京。及女真得其地。廢主亮以宋之紹興二十三年。定都於燕。謂燕為列國之名。改為中都。蒙古鐵木真於宋之嘉定八年。克燕。謂之燕京路。忽必烈以至元元年。復號為中都。四年。更置城郭。而徙都焉。九年。改稱為大都路。然則女真因遼。蒙古因金。燕都者。遼金元之故都也。明太宗而復都於燕也。何居。曰。太宗初就封於燕。當是時。蒙古之餘孽猶熾。習見燕都之宮闕朝市。不無窺伺之情。太宗靖難之勦。既集。切切焉為北顧之慮。建行都於燕。因而整戈秣馬。四征弗庭。亦勢所不得已也。鑒興巡幸。勞費實繁。易世而後。不復南幸。此建都所以在燕也。說者曰。天下有偏重之處。幽燕去河洛為遠。而去關中為尤遠。唐都關

中。以范陽盧龍斗絕東陲。為契丹奚室韋靺鞨所環伺。於是屯戍重兵。增置節鎮。祿山乘之。遂成天寶之禍。終唐之世。河北常為厲階。其後契丹得幽燕。因以縱暴於石晉。女真得幽燕。因以肆毒於靖康。勢莫如建為京師。俾禁旅雲屯。才勇輻輳。以潛消天下之禍本。况苦寒沙磧之地。莫甚於燕。而天子且以身先之。夫誰敢耽安樂而避艱難者。曰是未可以概論也。周都豐鎬。封召公於燕。不聞周室之亂自燕始也。漢都長安。高帝五年。封盧綰於燕。十一年。綰畔降匈奴。其時之畔者。不獨綰。且有燕。而亦不能守也。後或為燕國。或為廣陽郡。終漢之世。不聞燕之起而為厲。東漢初。祭彤著折衝之畧。則戎夷懷畏。迨於末季。劉虞收幽州。猶能撫循。且民歌思遍於境內。雖篡竊紛紜之際。稱雄者或不乏。然革易之初。為亂且遍天下。咎又不獨在燕矣。夫漁陽之禍。亦唐自召之耳。使委任得人。而制馭有方。安在祿山之能為變哉。史思明。李懷仙。朱滔。劉怱之徒。相繼而拒命也。朱克融之徒。復以盧龍叛也。論者不察其本。遂比盧龍若異域。謬矣。夫王者長駕遠馭。不難威行萬里。幽燕禹跡內地耳。乃謂鞭箠所不能及乎。且吾聞之。天子有道。守在四夷。勇夫重閉。君子所貴。以萬乘之尊。而自臨於危險之地。未為長策也。有定天下之勞者。享天下之逸。亦不必寒苦沙漠之地。而後可以建都也。曰然。則幽燕不可以建都乎。曰奚為不可。人亦有言。建都之地。關中為

上洛陽次之。燕都又次之。洛陽吾無論矣。漢都長安。則置朔方之郡。列障戍於河南。又開河西五郡。以絕羌與匈奴相通之路。唐人築三受降城。則守在河北。又置安西。北庭都護。則西域盡為臣屬。故關中可以無恙。及至德以後。河隴之地盡沒於吐蕃。而涇陽渭北。戎馬且充斥焉。然則朔方不守。河西不固。關中亦未可都也。都燕京而棄大甯。棄開平。委東勝於榛蕪。視遼左如秦越。是自翦其羽翼而披其股肱也。欲求安全無患。其可得哉。然則自遼及元。何以必都燕京。曰。遼起於臨潢。南有燕雲。常慮中原之復取之也。故舉國以爭之。置南京於燕。西京於大同。以為久假不歸之計。女真自會甯而西。擅有中夏。仍遼之舊。建為都邑。內顧根本。外臨河濟。亦其所也。蒙古自和林而南。混一區宇。其創起之地。僻在西北。而仍都燕京者。蓋以開平近在漠南。而幽燕與開平形援相屬。居表裏之間。為維繫之勢。由西北而臨東南。燕京其都會矣。明之都燕也。當法漢唐之成算。以開平大甯東勝遼陽為河西朔方之地。乃坐而自削。有日蹙百里之譏。無乃與都燕之初意相刺謬乎。說者曰。以燕京而視中原。居高負險。有建瓴之勢。太宗深鑒於金陵之已事。建都於此。實為萬世計也。曰。形勝未可全恃。而燕都之形勝。又不足恃也。太史公曰。燕北迫蠻貊。內錯齊魯。崎嶇強國之間。最為弱小。幾滅者數矣。及秦人滅趙。敗燕軍於易水之西。而國隨以亡。臧荼盧綰

國於燕。不旋踵而隕斃。彭寵以漁陽賈禍。公孫瓚以易京覆宗。王浚掩有幽州。辛晉
室多故。冀以自雄。而見伐於石勒。段匹磾有幽州而仍不能自立也。杜洛周葛榮韓
嬰之輩。旋起旋滅。皆不足道。高開道竊有漁陽。身死而地歸於唐。天寶以後。以河北
叛亂者凡十七起。其能免於誅夷保其宗祀者。不數見也。迨夫李匡籌夷滅於克用。
劉守光復繫組於存勗。而幽燕卒併於河東矣。契丹僭強者八世。竟敗亡於女真。女
真恣睢者百年。終夷滅於蒙古。烏在其為險固者歟。嗚呼。以燕都僻處一隅。關塞之
防。日不暇給。卒旅奔命。輓輸懸遠。脫外滋肩背之憂。內啓門庭之寇。左支右吾。倉皇
四顧。下尺一之符徵兵於四方。恐救未至而國先亡也。撤關門之戍。以為內援之師。
又恐軍未離而險先失也。甚且藉虎以驅狼。不知虎之且縱其搏噬。以烏喙攻毒。而
不知烏喙之即足以殺身也。不亦悲哉。然則當去燕京而都金陵乎。曰金陵可為創
業之地。而非守成之地也。局促於東南。而非宅中國大之業也。然則建都者當何如。
曰法成周而紹漢唐。吾知其必在關中矣。

南直方輿紀要序

以東南之形勢。而能與天下相抗衡者。南直而已。春秋時。勾吳齊雄長於東南。以兵
威破楚。臣越。敗齊。又掘深溝於商魯間。北屬之沂。西屬之濟。以會晉。公午於黃池。當

是時微越之故。吳且霸天下。項羽率會稽子弟渡江而西。一戰而斬李由。再戰而降章邯。夫山東豪傑起而亡秦者。已半天下。乃鉅鹿之圍。諸侯救趙者。且十餘壁。卒莫敢縱兵。及羽渡河。戰士無不一當十。遂大破秦兵。當是時。微楚兵。秦且復振。然則謂亡秦者。非江東子弟之力不可也。或者曰。明太祖以江南而奄有中原。為千古創見之事。此實不然。從來建事功者。得失雖殊。成虧或異。而其能發憤以有為。則一也。楚南公之言曰。楚雖三戶。亡秦必楚。故西北與東南。恒有互為屈伸之理。項羽劉季並起於東南。季成而羽敗。要皆力足以亡秦者也。桓溫用江淮之甲。覆李勢於西川。震苻健於壩上。走姚襄於洛陽。逼慕容於枋頭。可云赫然振拔矣。而驕蹇自用。功以不集。劉裕翦除桓元。收復荆楚。北平廣固。西定梁益。乃經營河洛。規取關中。以拓拔之。強濱河鎮戍。亦斂息而避其鋒。使不急成篡事。則保據河山。未可知也。謂非能以東南有為者乎。或者又謂吳楚之人。大都剽輕而脆弱。然楚漢用之而強。晉南渡以後。北府之兵。常為天下雄。祖逖自京口糾合驍健。擊楫渡江。威行河朔。劉牢之以北府兵擁洛澗。斬梁成。則苻秦奪氣。劉裕以烏合數百人奮起京口。直入金陵。而偽楚奔亡。則兵非不可用也。且夫曹操之用兵。武侯所謂彷彿孫吳者也。舳艫千里。南下荆襄。目中固已無江東矣。赤壁之役。狼狽北還。而後知江東未可與爭。苻堅以百萬之

國朝文匯

卷十九

八

國學扶輪社印

眾長驅而南。堅之心以為我之力足以東滅燕。西并涼。北舉代。晉人殘敝之餘。不足以禦其鋒也。淝水一戰。風聲鶴唳。皆為晉兵。堅雖不亡於晉。而已亡於伐晉之日矣。南北分疆。兩淮皆戰場也。往來角逐。見利則進。擇險而守。勝負之數。略相當矣。宋金忠之強橫。不能得志於楊行密。周世宗攻壽州。三年而後克之。宋於奔亡之餘。立國江沅。江中之戰。大儀之戰。順昌之戰。柘皋之戰。金人且惴惴焉。所憾者。主昏於上。大奸在旁。視君父如仇讐。中原如脫屣耳。使能內任李綱。外任岳飛。而謂不能直抵燕雲。吾不信也。然則謂東南不足以立國者。非也。晉之取吳也。用兵三十萬。而所出之道六。涂中江西武昌夏陽是也。隋之取陳也。用兵五十萬。而所取之道八。六合襄陽永安江陵壽春廣江廣陵是也。宋之取江南也。用兵十萬。而所出之道一。荆。蒙古之取宋也。用兵十五萬。而所出之道二。襄陽蓋吳與陳皆濱江設險。利在多方。其途以分其勢。南唐有吳越以撓其東南。而上流之勢復入於宋。一軍自荆南東下。而破竹之形成矣。元人用全力以取襄樊。宋之藩籬既已摧壞。但遣偏師掣淮南之援。而以重兵沿江直下。宋人已在掌握中矣。此時勢各殊之故也。或者曰。江東之形勢。係於楚蜀。而兩淮猶次之。晉人先取蜀。漢王濬巴東之軍。十四日而抵三山矣。楊素出永安。陳沿江鎮戍。盡為所陷。唐初輔公柘之叛也。雖發四道兵擊之。江州廬州也。而先登破敵。奪其險要。率從江州

而入宋平江南克其池州徑向采石伯顏入漢濟江引軍而東新郢以下遂爾風靡
且六朝都建康強藩巨鎮往往自荆襄江郢構衅稱兵為建康禍蓋上游時重之勢
也明太祖初定金陵陳友諒肆其凶狂爭太平犯龍江禍且迫於肘腋迨殲之於鄱
陽進規武昌而東南之勢大定夫然後措置兩淮興師北伐誠明於緩急之勢哉是
何也敵在淮南而長江之險吾與敵共敵在上游而長江之險乃制之於敵矣雖然
淮南亦未可輕也人亦有言欲固東南者必爭江漢欲規中原者必得淮泗有江漢
而無淮泗國必弱有淮泗而無江漢之上游國必危孫氏東不得廣陵西不得合肥
故終吳之世不能與魏人相遇於中原東晉以彭城壽陽為重鎮故桓溫劉裕得以
再問中原繼東晉而起者其時之盛衰大約以淮南北之存亡為斷楊行密起於江
南兼有江南北數十州於羣雄中最高為強盛李氏失淮南而國以弱未幾而國以亡
矣明初規畫圻輔跨江踰淮幅員最廣夫亦保江者不在江南保淮者不在淮南之
意乎蓋彭城邳泗北連青齊西通梁宋與中原形援相及呼吸相聞自古及今要會
之處也聖人舉動一日而周百世之防一方而通天下之勢其在此矣至於江淮之
間五方之所聚也百貨之所集也田疇沃衍之利山川藪澤之富遠近不能及也漢
吳王濞以鑄山煮海國用富饒招致亡命倡為七國之禍太史公曰夫吳東有海鹽

之饒。章山之銅。三江五湖之利。江東一都會也。魏晉之際。戍守淮南。用劉馥。鄧艾之策。興陂堰。事耕屯。則轉輸不勞。而軍用饒給。吳人於江南廢郡縣之吏。置典農督農之官。則穀粟充溢。雖疆場多事。恒無饑乏之慮。六朝時。往往修其故轍。是故未有不事民生。而可以立國者。况揚州富庶常甲天下。自唐及五季。稱為揚一益二。今魚鹽穀粟布帛絲絮之饒。商賈百工技藝之眾。及陂塘隄堰。畊屯種植之宜。千古未有改也。用以聚糗糧。厚資儲。則奔走天下。不患無具矣。豈偏淺瘠弱。僅固一隅者。可以同日語哉。或者曰。淮北風氣雜糅。類多頑梗。朱溫以碭山羣盜。而擅干唐祚。劉福通之徒。皆以妖術惑眾。騷動天下。今其餘風或未殄也。夫聲教一新。則觀感自易。其然。豈其然乎。

壬子集自序

賀國璘

嗚呼。國璘遂四十耶。蓋今日益恨國璘之不孝也。始璘讀四子尚書畢。先君雜授以左國以下諸大家文。語熟師曰。是子可教。毋令早縛制舉業。年十二為甲申歲。從先君避地西村。出所藏溫公通鑑文公綱目。令參觀之。暨他史書羅列焉。聽璘自閱。時方喪亂。家君躬課耕。暇則呼璘講說。或及農田水利兵陣算數諸書。又先君精六壬學。期數年後。盡以教璘。并求名師講易。兼通奇門太乙律曆象緯家言。然先君教諸兄又不如是。是其意不在小。宜願璘習訓詁工詞章。碌碌從博士弟子後博當世。不可必得之科名。苟且以榮其親。飽妻子。哉。璘習業兩年許。亦頗諳秦漢以後諸大故。於他學術雖不通曉。頗有志焉。嗚呼。假使此志不移。以至於今。三十年覃精竭思。何遽不古人若耶。年十四。忽隨諸兄出就童子試。五年六試學使者。年十九為諸生。發憤工制舉業。三謁省門。無所遇。益自工苦。誓不遇不止。童時所習諸史古文。輟不復讀。即偶及之。亦不暇久讀也。大失先君意。然滄桑以來。家計中落。外侮迭至。先君亦默然聽璘所為。弗復問。行自念年二十餘。力強氣盛。尚可為。倘得一第。稍稍為尊人榮仕而兼學。何不可者。嗚呼。璘年二十有七。詎知先君遽棄。統孤去耶。斬然衰經之中。始自悔恨名未得而學已失。冀在人不可必得之遇。喪在我可以有為之功。悵

惆十餘年。亦復何益。不孝孤所以椎心泣血而不欲自存者也。未幾以他人通糧。身罹禁錮。年未三十不得為諸生。家固貧。教授生徒謀食。又不得棄去。所為制舉業者。顧乃志趨日下。浪從諸少年論帖括事。益為無益之舉。近乃痛自刻責。謝絕之。然已晚矣。其於古人書為童時習見者。尚能記憶。否則隨讀隨忘。志大才短。屹屹為之咄咄自失。向使童子時。早從先君訓。不為世俗浮名所動。從事聖賢之學。所學成矣。即先君見背之初。就其稍知悔恨。便復奮自鼓勵。十年讀書。亦何至頽廢若此。今縱不能兼通絕學。旁及技能。奮其身為一代卓絕之人。又將自絕乎聖賢。見棄乎古今立言者。如儒林文學之徒。更混廁人世。無以異於庸眾人而死。死而有知。何以見先君哉。因思人生。中壽當作六十計。今四十矣。譬如已死二十五年而復生。漸從文章以徐進乎理道。尚可餘廿年力也。從此以往。歲必有集。集而序之。以稽勤惰。驗得失焉。自茲歲始。

送解東籬南歸序

同客大梁二年。解子東籬先子去。先後遊梁者十餘輩。獨東籬屬故人。每當前燭聯牀。征興郵舍。相與感舊懷新。語刺刺不能止。故兩年來。賴東籬在。頓忘行役愁苦。此豈可頃刻離者乎。當其別時。黯然魂消矣。顧太公春秋高。里中來者。傳言抱微疴。東

籬自春徂夏。畧不肉食。中夜數起。日中忽忽不聊生。近奉手書道無恙。始進一餐。其先予去者。徒以尊大人故也。家既貧。妻子饑寒可慮。而獨慮兄弟之尤貧。思有以贍之。為家書。必言設有急需。當稱貸待我。毋累昆季。予緣交深。時得寓目云。其純孝為愛如此。噫。今人疊疊頌說義理。若將置身古人中。或變色於微末之間。至於改常易性者。何可勝道。以視夫天真流露。內外若符。誠偽相去。不已遠耶。然東籬不能容人過。又每代人受過。而惡人之不信其無過。格格齒頰間。欲吐而強吞之。故常多病而善怒。予曰。君何為者。君將必人心之盡同乎。人心不同。君將盡見之聞之乎。所見者有限矣。所聞者有限矣。無甯盡置之不見不聞而忘之乎。天下事苟自處有餘。何必形人所不足。天地甚大。無不可寬然處之。君而反此。養生善物之道。皆非所宜。慎毋然。東籬領子言而未能改也。凡于此言。不語他人。而語東籬者。古人之別。必有贈言。不以頌而以規。交道宜然。惟予與東籬為故人。故以規進。

仲兄葵忱先生傳

賀向峻字葵忱。丹陽人。由諸生殉節。時稱賀秀才云。先府君仲子。少時出繼仲父光祿。丹崖府君後。世居邑之東鄉。曰蔣墅。十歲工文章。初試補博士弟子員。自曾王父起家甲科。蟬聯數世。秀才藉祖父餘業。家故饒。激烈負奇節。急人患難。不事生產。亦

喜樛蒲六博諸戲。一日盡數百緡。又好客。客常滿。以故家稍稍落。然卒未嘗廢學。知名於時。一再試弗售。鬱鬱不自得。日罵詈富貴人。指切時事。以為快樂。明季甲申時。留都新建。馬士英阮大鍼用事。方營苞苴。爭樹黨。以快恩仇。為得志。大清兵日南下。強鎮異心。秀才知事不可為。慷慨自矢。曰。吾名向字葵。葵取向日。先人命之矣。雖諸生。義必死社稷。時家益貧。然猶破產結死士。酒酣。歌詩拔劍舞。曼聲長歌。座客皆泣下。無何。金陵失守。披髮狂走數日。與汪生中子率其黨數十人去。中子者名參。新安人。為丹陽諸生。故金沙某翰林門下士。從在京師。會李賊入都。生趣和藥進。曰。某所以久居危城者。因先生未得死所也。先生負盛名。義當死。幸早自裁。某從此集兵江淮間。事成。滲賊血奠先生。不成。刎頸相從地下耳。某曰。唯唯。生幸教我。然度其無意引決。乃唾曰。而小人也。吾從而遊。誤矣。易服變姓名。從丐者。逃南歸。與秀才道故舊極微。至是卒與俱去之大垓山。旬日。聚眾至千人。有故宗室某起兵湖中。奉號令。引兵拔金壇。會湖中兵敗。夜失宗室所在。首事者齟齬。不知大計。眾又新附。稍稍逸去。秀才仗節巡軍中。呵禁不能止。急檄汪生謀。客曰。遜矣。秀才曰。中子非負余者。或勸秀才行。曰。共舉事。背之不義。吾與城俱碎耳。尋被執。見戎服坐堂上者。曰。監儒告我首事名。幸得活。秀才曰。兵敗死耳。無多言。有衣冠隅坐者。熟視曰。小生頗舉大事。

耶。則秀才素所熟識者也。秀才笑曰。咄。若非故明時吏部乎。我死若乃生。則大詬罵不止。其人默然慚。徐視卒手格示意曰去。遂遇害。越數日。兵出丹陽。勇士百餘人截戰竟日夜。有白衣冠持槩格鬪。被重創死。識之者曰。嗚呼。此汪生中子也。秀才死時年十九。一子理昭甫週歲。今年二十餘。事母孝。工詩好古文辭。不樂仕進。秀才兄弟六人。其第五弟則余國璘也。

國璘曰。理昭夜讀書。輒掩卷哭。沮之不已。則相對泣。助其悲哀。方兵興時。余從先人避西村。死夜至。與諸昆耳語。久之。已慷慨泣下。余時雖十餘齡。意頗淒咽。黎明決去。拔簪髻余簪。至今在也。嗚呼。兄死二十餘年矣。無葬地。以封其墓。無國史以載其事。無田廬以贍其妻孥。孤嫠啾啾。其人斯在。痛哉。然與殺吾兄。所謂故明時吏部者。後為事伏誅。妻子徙邊。禍尤烈。太史公曰。死有重於泰山。有輕於鴻毛。嗚呼。信夫。

策畧五

張貴

兵甲者帝王所以藏神武而威天下之具也。故常百年而不用。用則鳥驚獸伏。天下震駭。雖山川百神莫不奔命。恐後以聽人主生殺之令。故兵一試而海內咸服。天下血氣之屬莫不延頸張喙而不敢發聲。帝王非黷武也。拯天下之困苦而除其害。誠有所大不得已也。是以六月而興師。三年而弗息。士轉戰於外。室家轉輸於內。死喪載道。而不敢有愁苦怨歎之聲。罪人逆命。亡所逃死。則銜璧肉袒。伏斧鑕以叩軍門。夫是之謂帝王之兵。今之兵亦屢用矣。屢用而罪人弗服。則損威而失重。豈惟弗服。彼賊乃敢與天子之執事稱兵。賊屢勝而官兵屢敗。此其故非小也。臣逆君而子拒父。敢於露刃相向而亡忌。臣甚惡其漸也。執事弗察。習以為故常而不覺。是則大可憂也。夫用兵之失策。無過於今日者也。一失而為會勦之兵。再失而為尾賊追討之兵。秦晉豫楚被賊之境。各出師以擊賊。無所專責。我嘗勞而賊嘗逸。在我有徵發期會之煩。而賊有飄忽衝突之利。合數省之兵。築長圍以困賊。不勝其勞。賊軼出而乘我不虞。攻陷郡邑。無怪乎師久而無功也。豈儒誤國。則曰以蜀為壑。驅之萬山之中。前阻夔門。後距荆楚。四方之師雲集。勢如圓盤。滴水不漏。虎在檻中。潰圍而噬。人隕我名藩。戕我王者。此亦喜事而急功名之明驗也。在事督撫諸臣親見前車之覆。宜

上請天子保境息兵。訓練精兵堅甲。以遏方張之寇。而又招募壯勇。激發民間忠義之心。收攬豪傑。以孤其黨。鐵城寨以防侵掠。堅守要害。名都以固根本。則敗衄之元氣可徐復。而潰決不至於已甚也。乃廟堂之議。必曰用兵。盡中原之兵力。而欲與賊決一死戰。夫與人角力而爭勝負於一旦者。此匹夫之雄也。今賊雖強。不過曰賊也。合天下與圖所在。其為賊所潰瀾者。不過十分之三也。譬如博者。兩家相持。尚無大負也。奮其憤憤不平之氣。出十分之七與十分之三爭一博。未見其萬全也。萬一博而再蹶。其何以袖手而退哉。是可為寒心也。即如博者之爭道。亦聽當場之自斷也。而旁觀者又雜出而撓之。不顧臨局之是非。奪其手而強之使博。其必不能以取勝。亦明矣。今國家以用兵討賊之任。委之督撫。而給事御史。方奮臂於廟堂之上。哓哓然伺其瑕而攻其罅。是亦奪其手而強之博也。夫自古用兵。固難逢度。顧臨陣之方畧。何如耳。試使孫贖吳起為將。而給事御史攫其柄而代之謀。未見其成功也。陛下既以用兵屬之庸人。而又使眾庸人參之。俾一庸人憂讒畏譏。而莫敢專決。幾何不以封疆予敵哉。臣願國家之養威。而蓄銳持重。以待賊。毋徒躁急以覲萬一之功也。

董文友文集序

余聞馬遷為文。杜甫為詩。率以名山大川。恣其馳覽。故胸懷曠焉。發為文詞。卓越千

古。非偶然也。十年以來。余性耽游。又喜憑弔。湘江渡河。過信陵。輒酒澆無忌。公子墳涉燕趙。經深井里舊居。及高漸離擊筑處。數日夜不去。時或日暮藉草卧。卧已而哭。哭已而詩。道旁人笑之。以故余詩所及。類皆齊魯秦晉宋衛燕趙中山之屬。幾半天下。聽友人言荆楚之勝。洞庭彭蠡之險。未嘗不心神飛越。輒思東南游。今年冬過毘陵。董子文友從楚還。出楚游詩詞古文一編。讀之。竟夜不能寐。董子年最少。才藻橫發。諸體無所不備。正如王勃賦滕王閣成。一夕而名噪海內。則甚矣楚游之壯也。余詩未出。今此集獨單行馬遷杜甫之後。意在斯乎。余所至匿姓名。所交多賣漿屠狗者。雖足敝屣穿而名不傳。文友非文人不交。所至輒傾倒。能以隻字爭傳江漢間。此又南北游道之異也。嗟乎。元魏風謠詞旨剛毅。比之秦風。江左風華。率多子夜前溪。春江玉樹。昔人以為南風不競之驗。以視文友據樓長嘯。何其壯也。風氣將遷。山川激越。余同老滄父甘拜下風矣。

獄卒張道傳

刑部司獄有獄卒。至賤役也。不敢與卑隸伍。市井負販皆恥之。獨能奴使巡更擔水之夫。輒加訶督焉。巡更擔水之夫。貧不能給衣食。日夜抱鈴柝。擔水漿。供給獄中。以自活。於是所以奉事獄卒。惟謹。余歷十有二年。再罹犴狴。有獄卒張道者。如舊相識。

而意氣揚揚。顧盼有驕色。問其故。則向年擔水夫也。辛苦供役。歷十有餘年。積錢至五十餘貫。得為獄卒。夫而今乃得快意肆志焉。於是轉相訶叱。巡更擔水之夫。乃益甚。視天下王公貴人爵位之尊。更無以加於獄卒者。蓋其積辛苦勞。歷十有餘年。登於斯位。有志者事竟成也。嗚呼。昔江陵相柄政。滿一品。考十有二年。衣緋橫玉。充大婚納采使。趾高氣揚。舉朝惡之。其以是哉。微獨此也。齊桓公霸東海。衣裳之會。三兵車之會六。至於葵邱。乃有驕色。於是不復能再合諸侯矣。古今以來。王侯將相功名垂於鼎鍾者。常致歎於盛業之不克終。蓋有由也。虛則盈。滿則覆。宜虛語哉。雖然。彼獄卒者。志已足也。有驕色。無競心。視夫昏夜孜孜營進不休者。大有間也。是高於時賢一等矣。為之傳。

秦論

唐靖

桀亡夏。紂亡商。幽厲之惡等桀紂。而周不遂亡者。何也。無湯武焉。爲之代也。然而周之亡也。斷於幽東。遷於洛。而岐豐八百里之地。悉捐予秦。春秋之天下。屬於桓文。而周顧聽命焉。此與夏之祀殷之宋何異。區區至於赧。而文武不祀矣。夫古未有並建兩京者。自周始也。固不爲其後之子孫之東計也。向使秦踵湯武之故。封赧而存之。其得封而返於周也。如其未亡也。其亡而入於秦也。亡其東周之三十六城。而非天下也。故吾以爲周之亡也。不在赧而在平。秦之亡也。不在胡亥而在始皇。何也。人知平之失西周而不知其失天下也。人知秦之得天下而不知秦之亡其國也。秦之先非有積業之業。崛起戎狄之中。南面而爲諸侯。固異數矣。彼其守崤函擁雍州以世子孫。而天下其孰能亡之。及天下見并。而秦亦遂以滅矣。秦之國。天下不能亡。而秦滅天下。反亡其國者。何也。滅六國也。六國之滅於秦也。勢也。秦之滅六國而亡其國也。亦勢也。六國非秦不能滅。秦非滅六國。天下必不能亡秦。今有虎六於此。千人莫能支也。遇一熊而殲矣。一熊而遇千人。則熊又碎矣。何千人之力怯於虎而勇於熊哉。六虎之不殲。而可以碎殲虎之熊。勢專而志一也。六國之君可哀矣。秦遣一說士入其國。一戰將臨其疆。慄慄焉救死於頸之不暇。而敢有亡秦之心乎哉。雖有忠義

之士無尺寸之藉。憤然而起。欲以亡秦。而其君固已斷其首而獻之秦矣。天下之民之苦六國也。無以異於苦秦也。使六國能滅秦。天下之苦。吾憂其未艾也。秦亡六國。而天下之苦。乃集於秦矣。民不能亡六國。而秦亡之。六國不能亡秦。而天下亡之。一夫大呼。天下響應。智者謀。勇者奮。各出其力。內之非有兵權之制。進之已無堅城之守。而退之亦無失地之憂。鼓行而前。濟則王也。不濟則死。且秦之所以劫天下者。死也。而天下固以其死死秦。而秦之詐謀。所以遣說士而惑其主。捐多金以間其將者。固已智盡機索。而無所施之。崛起之徒。獨可恃者力耳。然始也以全秦制一國。而五國不敢動也。今也以一秦制天下。而莫知其所制也。而力已無救矣。而秦亡矣。賈子曰。仁義不施。而攻守勢異。吾以為秦必不能施仁義也。然施仁義亦亡。譬之烏喙也。其毒已潰其腹心。而裂其四支。而尚欲以參苓活之乎。周之王也。基於靈父。勤於公季。而文王又享國五十年。蓋三世而仁於人者。如此其久也。天下之歸文也。三分有二。而會武於孟津者八百。仁於天下如此其廣也。然而殷民猶未靖。淮徐猶並興。義士猶或非之。而親兄弟如管蔡者。猝起於肘腋。而天下幾失而僅存。嗚呼。蓋人心之難服如此。秦自商鞅以來。所殺三晉之民數百萬矣。燕齊楚又不知其幾也。既無重世之德於天下。而有六世之怨焉。此時而欲以區區之仁義欺之。天下之心。其遂肯

釋然而無所憾乎。縱使天下之勞民。冀須臾得安其性命。而其間草澤之豪。張良項籍劉季之徒。為愚賤倡者。秦能悉知之而悉舉之。而使之為我德耶。夫周以數聖人累世之大德。易天下之至暴。而猶不能服一邑之心。秦以數凶人累世之大惡。殺天下千百萬無罪之人。而遂欲以安天下之心。吾知其必不能也。崑岡之火。匪直輿薪。雖決水於河。其可撲滅乎。夫使其行仁義。吾猶以為毋救於亡也。而況乎必不能也。秦滅先王之法盡矣。姑毋論其井田封建。必不復今。即使之崇詩書。均阡陌。輕什一。去參夷。省禁防。賤戰功。立師儒。而秦又不能何也。秦以詐取天下。而日夜恐天下之詐之也。故其法日益酷。而禍日益深。或曰。胡亥不立。秦其遂亡乎。夫亥之立二年耳。其所以速於亡之具。與起而亡秦之人。自政而已然也。阿房築怨。長城築愁。亥成其志耳。且夫開闢以來。天地之所未有。秦政之所欲為者。何不為也。顧無如死何耳。然而天下之欲肉之也。荆軻以匕首。高漸離以筑。張良以鐵椎。陳涉有富貴之志。項籍有取之之心。高祖有丈夫之數。天下之人。曷嘗須臾忘政哉。政之全首領於三十六年。天也。使政不死。則望夷之禍不在亥。而軹道之降不在嬰矣。吾故曰。秦之亡也。不在胡亥而在始皇也。嗚呼。秦以百年之力滅天下。而其亡也。以一朝。三代以來。未有若斯之促者也。而孰知夫其所以滅天下者。乃所以自滅其國乎。方其亡也。外馬

無一城為之守。內焉無一將為之死。威振天下而不得一臣一子。誠可哀矣。而天之所以滅之者。使其子若孫盡滅於胡亥之二年。而後項籍舉而殲之。然猶未足以償千百萬人之死也。而後之儒者。乃欲以區區之仁義責其不能守。亦過矣。

魏公叔痤論

魏公叔痤病。惠王問之曰。公叔即不諱。如後事何。痤曰。痤之左庶子鞅。年雖少有奇材。願王舉國而聽之。惠王不應。痤又曰。王即不用鞅。可殺之。毋令出境。已而鞅入見。痤語之故。且告之行。鞅曰。王既不能聽公之言用臣。又安能用公之言殺臣乎。嗚呼。此魏之所以亡。而痤之罪為可誅也。既欲其君舉國從之。又勸其君殺之。已復甚其人之亡之。何悖亂若此哉。古大臣之於國也。賢者及身而用之。國有得人之慶。而君無與也。趙文子舉於管庫之士七十餘家。而衛公孫枝與其臣僕同升諸公。君子嘉之。痤執政於魏久矣。而鞅之才。痤所知也。宜與之共聞政事。不然。以時言之於王。使立功以為信可也。及其身死而後言。鞅非有信於王也。而欲其舉國而聽之。身死之後。豈可得乎。且痤亦知惠王為何如人哉。夫陰鷙之才。自我用之。自我殺之。而斷然不動者。英雄堅忍之所為。非庸主之所能行也。痤既不能用之於未死之日。而欲以素不相信之人。責庸主以英雄之舉。是痤非徒不能用鞅也。且先不能知王。不知王之

不能用與立朝而不言。是竊位也。知王之不能用與及死而言之。是嘗主也。既已知其不能用矣。將以殺之言為可却。王於必用耶。抑誠盡忠於國而故不惜其才以母貽魏患耶。是欺友也。有三罪焉。弗可逭也。雖然。是皆未足以責痤。今王弗信而自棄其才耳。設令公叔之言行。魏以富強。而公叔獲令名於後。不且與古大臣爭烈乎。夫與其君言之。而與其臣洩之。巧以樹怨於君。而以為己德。陽博為國之忠。陰示不賣友之義。度其心亦曰。吾即死耳。而痤死而魏亦遂空。何也。夫小人酷烈之資。未有不先忍於其君父者。然譬之機焉。不伏則不發也。語曰。國狗之瘳。無不噬也。噬之則其毒愈深。痤之教鞅。所為族狗而噬之。伏機而發之也。以鞅之才。能用魏亦能滅魏。鞅不為魏用。必出亡。出亡而徙安邑。虜公子卬。魏日以弱。卒先天下亡。使秦東向而制諸侯。則皆鞅之謀也。然則亡魏者非鞅也。乃公叔痤也。

吳越王錢俶論

上古之有天下也。以名。後世之有天下也。以實。天子者名也。實者有天下者也。唐虞三代有天下之心也。漢唐宋有天下之地者也。古者諸侯世守其土。自其祖宗而子孫。千有餘年。尺土予民。天子不敢爭焉。所爭者天子之名而已。名之所爭。又視天下之羣有實者奉之。而後出於一。孔子曰。天無二日。天下方奉我以名。而我敢利其有乎。

郡縣之變於秦也。非秦變之也。夏萬國。周三千焉。遂離為十二。判為七國。以一於秦。勢漸然也。自是厥後。受命而興者。必實出於一。而後天下不敢有其名。是以尺土牙民。有不隸版圖者。皆得以逆命誅之。而一時僭割分雄之國。因不得以三代侯服世子之義。為斷秦楚之際。六國復起矣。高祖滅之。新莽之亡。公孫述王。即廬芳。劉永。自帝矣。光武討之。南北六朝之極。與唐勅者。李密。王世充。竇建德。其最。而蕭梁亦世有江陵。太宗平之。五季之裂。南至江淮。極於閩粵。西至巴蜀。北至燕晉。皆自唐之叛孽。以種易數世。宋祖克之。凡若此者。初非積功勞。為伐閭。與分三列五命之天子。傳之祖宗者。殊科矣。若吳芮之率百越。竇融之保河西。為漢佐命。錢俶之歸吳越。祚及子孫。逆順之理。存亡之機。豈不粲然哉。或者乃援君死社稷之義。以責俶。夫所貴死社稷者。謂凡為五等之君。以弱小而滅於強大。夫我固與彼等夷矣。今而辱於俘囚。為之臣僕。故甯死而弗去也。是以春秋於厲公。則非之。若以天子討有罪。雖降必戮。而况死子以重之逆乎。且所謂天子者。猶曰為天之子。而有天以下云爾。然古者封建之天下。天子與諸侯共者也。苟非大惡極暴。無故而加之兵。則圓視而起矣。後世郡縣之天下。天子所獨有者也。尺土牙民。其孰敢違焉。而一時僭割分雄之輩。因天之未有子而竊以自私。及天命以子。而假而不反。是逆天也。天可逆乎。逆者亡而順者

存。天之弗知而責以人之弗守。則是公孫述之不為降天子。乃聖賢之徒。而孟津之八百侯。顧皆黨亂耶。噫。是亦不達於古今之變者也。宋祖遣倣而遣以黃袂也。人以為帝王之度哉。夫將示其幾而奪之魄也。江南已夷。宋獨愛於吳越乎。周世宗之於江南也。服而舍之。褒嚴續之忠。申之以守禦。宋殺林仁肇以間。又惡己之負也。責其入朝以興師。彼度量之相去遠矣。人亦有言。及在其頸。身為大梁布衣矣。倣不納。宋必自取。與其需時以速禍。孰與先幾而不失富貴之全也。然則君死社稷之義。非乎。曰。後之有天下者。不幸而瀕於亡。尚其無負也哉。

徐掌文傳

君諱鏞。字掌文。松陵之西潞人。其先世乎農業。父瑞。吾公鄉里稱長者。始以詩書訓子弟。大振礪聲。君少而穎異。年弱冠。有聲庠序間。嘗慨然曰。丈夫即不遇時。勒名萬里。奈何坐老田舍。與株塊埒哉。稍厭簿章。力古學。為詩歌。買一姬。字之曰季斯。教之詩及書畫。皆工。君即於所居處辟一園。名之曰一掌。閑庭小閣。喬木離立。蒼烟素濤。出沒變滅。蓄古書萬卷。圖記數百軸。內則與姬人季斯商較金石。摹畫丹青。或書史傳疑。烹茶命中。舉杯歡笑。外則與同志徐松之等。高歌劍舞。一杯一曲。共淡宕於春花秋月之晨。高軒過者。無虛日。由是而三吳人士。藉藉知有掌文矣。是時同邑吳

公某方以文章聲振江南。海內樹詞壇者。吳視蔑如。君獨以英雄之資。意氣相許。握手語終日。酒酣以往。破涕談兵。縱橫天下事。唾壺為之幾碎。會甲申告變。山澤之揭竿者數十萬計。君亦以草莽士。破私家而起佐吳。於是江南之兵。號吳為盛。踰年。吳盡義越州。而君之愛姬亦大矣。君抱內外之感。知時不可為。乃與其弟鍊。奉雙親西渡太湖。聞前溪山中。衣冠猶古。欣然至止。變姓名隱於西岑塢。自念親老矣。可幸無事。猶得聚首於斯。吾菽粟飲水盡其歡。以待天下之清。即天下事未可知。而吾讀書固窮。吾志終不少變。嗚呼。君今死矣。君以丙戌之夏入山。樂其山水之奇邃。人物之敦龐。將終焉以老。又三年。盜兵起。避於清溪之戰勝圩。抱疾鬱鬱以卒。為己丑秋之七月一日。年三十餘耳。靖往哭屍。得其遺文數篇。詩若干首。錄之而付其友徐松之。雖未成集。然豹死留皮。即一斑亦可重也。

唐子曰。吾邑之先以忠勇拒元兵死者。有徐道隆其人云。考之史。道隆為武義人。而邑乘系之武康。意其先世武義。而後或流寓吾土。遂家焉者乎。吾友產松陵。獨避亂山中。潔身以死。雖功業無可見。志足悲矣。兩賢皆徐氏所志又一。豈必其土著哉。即所居山水猶樂道其人。後之稱掌文者。不猶今之稱道隆耶。要之均於吾邑有光也。

吳伯玉傳

吳公瑗名伯玉字其先歙人號溪南吳氏明嘉靖間有九竹公者樂武林山水家焉傳子叔度為杭郡學諸生故事商受黜於浙子弟遊學者非土著不得試公請於朝立商籍今所在與試士自童子以至立朝皆公所成就故至今士皆主而祀之以無忘公之德有子八人世比於唐之崔漢之荀周之南宮又上之以為吳氏當今元凱也而伯玉公居長公秉異姿於書不過一覽學宗濂閩文必師古大家試輒冠多士當事多賓禮焉縣校童子得公卷奇之謂此大儒文母乃代童子欺我置不錄而公文已藉藉士林鄉先生交為言吳某文雖老年甚富真英雄也奈何以捉刀人疑之哉令大驚自以為失天下才也秀水朱相國重公名聘為公子師薦入南畿辟雍公竟以太學生終云嘗侍親疾藥勿效刲股肉以進本草云人肉可起沈疴世有愛親者行之或不驗而公竟得愈親疾非其天幸至性所格也公之順親友弟和閨門所以修於家皆有可法固非求知於世者而公卒老太學未有卓然豎立於朝然其見義必勇不以死生怵足以媿朝之辱身汙行以媿阿於時世鮮有知之而史未之傳也天啓朝璫虐饑張毒流士大夫為其養子者生祠徧海內而君尊人故有書院在湖麓招同學者砥志論文其中祠紫陽焉至是將攘為闕祠君不可有陽好者謂吾與爾圖此甌脫耳不棄且速禍君曰此余小子承嚴訓以昭事先賢者也祠可攘先賢

其可黜乎。惕威以調邪。吾不能守道以危身。吾亦不避。卒不可奪。而璫亦敗矣。當是時。怵公者慮無不須臾中危法。謂其愚。宜料璫之敗哉。夫於禍福為愚者。於義理為勇。孟子曰。人有不為也。而可以有為。推此以立朝。決大難於危疑。呼吸而不動色。言則犯顏敢諫。守則固死封疆。皆其素所樹立也。惜終老布衣。不得有所為。而君之大節。幸其時否極而泰。以全其真。而晦其名。世故鮮有知者。然是則可傳也。長公子鏞舉進士。官平樂司李。君教之曰。粵西新出湯火。職又司刑。非以殺人。期以生人而已。由是粵西稱廉明。皆公教也。司李君先公卒。公之澤又未獲大施。而次君鈺文孫祖謙甲傳。皆以文章行誼世其家。承歡色養於膝下。蓋公八十有八。諸弟與公偕耄者三人。每湖山燕遊。鬚眉皓潔。好事者至。繪為圖。以為生而八元老而四皓也。嗚呼。可謂德榮矣。公考終之明年戊申。鈺次其行狀。以乞於立言者。而某為之傳。著其大節之不可朽。以俟國史。嗚呼。是則可傳也矣。

梁孝子傳

孝子梁其姓。未名。武康民家子。江南隘。其二年。羣盜轉入天目西北諸山。率夜出城市。繫民之富者。幽山中為質。視其家之等。而上下其贖焉。不足則殺之。孝子之父被執。父故有怨於其黨。孝子持金因謀入見賊。賊曰。若來以百金。金若父。否則毋污吾

刀也。指所殺者示之曰：骨如是，庸可數乎？孝子遂歸，則鬻產息。又益之於撤宅，得百金以進賊之客，私其三焉。賊大怒，遂殺其父。明年，賊敗，出降縣。縣利賊厚賂，令民毋得仇賊。孝子聞之，仰天大呼曰：嗟乎！賊今乃得出，探懷中刀手磨之，即走至縣。遇賊於門，呼之曰：賊汝今乃得出，汝利吾財而執吾父，吾財盡而父不見來，汝今出而吾父安在？願還吾父。賊曰：已殺之矣。曰：願還吾骨。賊笑曰：吾殺人骨已多矣。若前入山而不能數，何有於若父？孝子則噴目疾起，左手把其胸，而右手自袖間出刀，刀入脇一寸。衣三襲間之，賊不意猝至，大叫仆地。門者疾共持之，賊得脫入至堂。縣大怒，謂敢違吾令，不殺汝。毋以勸降者，重鞭之八十，悶絕良久，復蘇。觀者數百人，咸驚數有泣下者。孝子自痛而已。左右既曳出，復下獄。其鄰之程姓者，樂之，得不死。既出獄，復置刀於懷。晝夜視之曰：汝知吾心。賊遁去。孝子時年十八。或曰：孝子死而成名，乃愈於生。孝子生民家，年尚幼，目不覩詩書，奮不顧利害，決一舉其心，固欲以得父仇也。豈復知有名哉？使仇得而身死，奚愛乎？方賊未遇時，志固未嘗須臾忘也。幸而遇賊，事不濟而死，死安也。雖死是其仇將誰報乎？幸而不死，賊終必不生，是天所以全孝子之身而成其志也。雖不死其無名乎？嗚呼！若孝子者，不其難乎？

節孝女曹六姑傳

節孝女曹六姑。餘杭縣舊市曹女。錢塘縣鉅蜜洪婦也。未歸而夫夭。哀慟求奔喪不獲。誓曰。我生不洪氏婦。死終洪氏鬼耳。絕食數日不死。啓窗見庭前秋海棠泣曰。此花名斷腸草也。我畢命於是矣。扃戶擣汁。家人知之。急排闥入。傾又不死。因共慰曰。母在。奈何使母傷苦。縱死獨不念母耶。女感泣遂不死。輒持所聘幣展對哭泣。母陸謀反。洪女曰。此非聘免物耶。不可反。又不忍留。盡製為經蓋殯帳以施。供佛。康熙壬子五月。陸病。女刲股以進。不應。炷香於臂。稽首籲天。請以身代。不應。九月二十六日。陸死。女遂決死。諸姆兄嫂日環守。諭曰。盍送斂乎。既又勸曰。盍終葬乎。不可。則又曰。明年正月上旬。母百日也。盍屆期乎。臘盡水漿不入口者十日。舅家命婢往。女聞。絕而復蘇。蹶然曰。我終不能死乎。元旦縫衣。哀治斂事。泣告兄嫂曰。我當死十餘年矣。所以忍死遷延至今者。徒以老母。今母死。我將從夫地下以終。我志。斂屍必我嫂。他人慎勿汙我身也。遂縊於母之室。其日疾雷震動。是為癸丑正月四日也。女五歲而喪父。十五而字人。十七而夫殞。三十而母終。蓋事母二十五年。守節十四年而後死。越六日乃斂。斂如生。觀者萬計。餘杭之人走泣謂曰。此吾邑舊市曹氏之女也。錢塘之人走泣謂曰。此吾邑鉅蜜洪氏之婦也。皆以告於有司。有司上之督撫。而聞於天子。詔下樹楔旌表。嗚呼。曹氏女為不死矣。

唐子曰。本乎天者性。成乎人者志。志定而性盡。性盡而命立。彼女也。何知性命。顧其志必有成耳。余讀柏舟詩。悲共姜之志。未嫁共伯而蚤死。故其詩曰。覯彼兩髦。實惟我儀。守義於父母。故其詩曰。母也天只。不諒人只。然卒從夫諡。誠哉之死靡慝者也。曹六姑崛起民家。終其身三十年一處子。以畢事母而後死。嗟乎。女不死矣。事母孝也。以女盡孝。孝益難。不嫁節也。以女守節。節愈苦。斯乃古之所謂盡性立命者乎。與共姜先後爭烈矣。

披雲山記

許楚

披雲山去郡治西南二里。隔新安江。以山勢峭拔。常有雲氣繆繆其上。由新民橋度石壁五百步。土斷而崖分。有積石橫當其垠。其上為王家山。東跨長峽可四十丈。捫蘿而上。為披雲嶺。趙宋蘇德祥建亭於此。歲久址亦頽廢。其山勢尾蟠荒陬。首注大溪。其水北至昉源。出夥山。南至乳灣。出鄣山。西至屯溪。出率山。東至嚴陵。凡五百灘。從飛石翔舞橫端。晝夜與三浙水合而歸於海門。其山腳垂石潭。產鯉魚石鯽。桴寂晝永。時常數百頭來會巖下。其左右多重港淺渚。重洲小溪。靜者涵默。動者騰白。其塢藏古刹十座。即唐至德中所創興唐寺院。其中梵唄禽響。鐘磬連雲。懸以乳泉雪竇。絳壁青岑。其林多槐。楓栴梗。銀杏蒼梧之種。雜以短松瘦竹。其卉多山礬。踰躅夜合。洛陽綠縷。紅絮之類。幽陰蒼蔚。不經名狀。晚步吹香。曲有生意。其鳥多赤首烏。喙碧珠黃眉。夏秋之交。時翔狎几席。忽山風四起。羣谷振動。喧亂屠砌。掩苒眾草。翳勃之氣。逐人衣裾。洎以昏旦變候。猶難殫紀。余於甲戌春徂來居此間。坐卧不去。於是懸榻丹林。濯纓碧澗。青陽謝事。則長嘯平臯。素景澄秋。則栖掩虛室。會有初月在山。鄰僧夜至。悠然偕語。夢亦同指。可謂茲山之因於斯暢矣。爰作披雲山記。是為八月壬申中秋後五日也。

遊靈山記

靈山去新安江二十餘里。徑漸高。草木林澗漸幽。未至山數里。仰見赭巖懸峙。冠以青岑。與嵐霞相亂。至白沙嶺。忽連山競險。接岸爭昂。積石磊泉。相挾而上。雖崖壁峻岨。奇矯干天。殊有環曲。極於其頂。俯之則磐棋練江之野。鋤峰黃海之前。羅巖九舉。各尊一壑。矯岫負岨。異巘同勢。或石列松巔。蔕鵲峰穴。交柯雲蔚。霾天晦景。雨則野瀑傾潭。懸湍迴注。中麓有石橫垂。騰躍數仞。名曰車蓋。獵人觸之。終不見獲。近為樵豎傷伐。斲曰悟石。或其苗裔。下瞰寒泉。眾山倒景。深不掩鱗。池名鱸魚。古老相傳。昔有鱸魚飛入。理涉誕異。池上有漢章帝時方鵠侯祠。泉脉引苦。壇宇虛肅。後元至正中。李韓公亦讀書石上。龍興帝業。道於斯存。覽其餘誦。依然息遠。若夫良穗吹陸。觸裾延賞。四虛莫倚。浮響無賴。流嵐半攜。纓帶山阜。俛眺平林。煙杳在下。秋冬之際。行者徘徊。猶難為情。予於崇禎乙亥。結夏將秋。與程子如晦約遊茲山。適社集靈陽山。林之友盧至。顧而樂之。屢殊賞也。暨以金鐙遘現。緇俗傾往。予得從同人涉巔而觀。會見巖景潛歸。伏光幽發。施於殊壑。縱若浮天。已而西角漸曩。璀璨萬狀。絕人思議。諺云。種鐙多寡。卜年豐歉。土人試之。輒驗。是夜枕席巒次。燒松炙片。如晦作鱸魚悟石之章。予亦踞石而歌曰。清泉灌頂。分藕花肥。筠簞貞萸。兮冬夏齊。白石爛兮。雲依

依鱸魚何來兮。爲倖飛。翁兮翁兮。胡不歸歌罷。如海起舞。予亦飄然。夢寐蓄之。尚存娛慰。

義烈黃公傳

黃公名明邦。字君亮。世爲歙之孝行里人。父柱。以繪事顯名一時。公夙具巧慧。善詠諧。能世父雅藝。遂耕硯自給。壯不婚娶。編籬唐孝子廬墓之側。孑居一室。所需日用飲食。皆手自庀。饗尤嗜汲名泉。煮茗供客。談笑終日不倦。乙酉九月。

大兵入郡。里胥奉雉髮令急。公急掩扉絕食。示諸子弟曰。余雖山澤褐夫。衣草茹菽。受本朝雨露。且七十年矣。矧茲顛毛種種。夜臺路迫於世何求。安忍復見此事。子弟勸慰者多。嚴謝之。尋以居恒所御紙屏竹榻。皆分布諸子弟。是夜擁被僵卧。引匕首自刎。漂血盈席。諸子弟奔奪不得。截喉氣頃覺。喃喃有聲。篝鐙諦視。公猶瞑目。張髯抵夜半。挾胆而長逝矣。鄉人或相驚異。聚哭於寢。爲公盡哀。成禮殮。公野服奉葬於里北函泉之陽。祔家廟而俎豆之。其族之儒者。相與議公私諡。勒諸墓門曰。義烈先生。

青巖子曰。余往過義烈門。樂就其棋枰。香茗間。聞謔浪諧笑聲。固以爲滑稽蕭曠之徒也。詎意其真剛至性。潛伏上根。一發舒而遂有此斬絕煊赫之事。與山嶽爭巍。爲

國朝文匯

卷十九

二十三

甲前集
國學扶輪社印

布衣吐氣善乎埋公蛻於函泉之岡。長松競壑。石坂彌天。皆公生平杖履所遊憩者。御清風而栖浩魄。其霓旌鶴駕無不適也。

太學韶石吳君傳

韶石君既葬之明年。其嗣君玉樹持從父滌元所述君狀。請予銓次其風烈偉行。而為君傳以藏家。乘君諱璫字珍魯。號韶石。按家系出唐御史少微公後。由海陽之石舌山。自宋遷臨溪。由臨溪遷歙之篁南。諱宗者。其篁南始祖也。雲裔蕃盛。奕葉纓組。歷十八傳而至君父文學浮休公。廓貽謀明經修行。士大夫尊之如太邱。通德公。中年舉君。君生而穎慧。姿儀秀整。舉止嚴重。浮休公每奇之。督勵家塾。日不少懈。弱冠令肄業太學。時中土康阜。海內鄉校拔尤之彥。及華胄英雋子弟。皆橫經負笈。咸集南雍。醉君聲氣。傾蓋握手。歡如平生。而鉅公卿袞者。雋高流。以文章氣節風雅翰墨震耀江左。如太史求仲。韓公臺長衣白紵。公徵君仲醇。陳公處士孟陽。程公與君面。權今古。徵逐晨夕。尤稱欵洽。君襟懷豪邁。器識宏遠。而敦倫慕義。拯急援危。愈根至性。值浮休公春秋高。君以冢子兼持家政。承歡子舍。友愛同氣。多順色導意。以怡悅堂上。歲辛巳。郡大饑。君解橐率眾。酌古良法。修賑族里。勤恤備盡。不濡不濫。閱二百日。都鄙之間。鵲形菜色。恍遊暘谷。值浮休公偶客平江。甚以故鄉歲凶為念。得家

書大快曰。是兒可謂能養吾志者矣。壬午。浮休公捐館舍。君痛毀幾殆。與諸弟勉襄大事。鄉人侈頌其盡哀。輓禮會宗祊。以小隙啓釁。再歲不解。君悚然於中曰。以同堂而雄市井之競。不祥莫甚。遂殫力消弭。一門之內。雍睦如初。惑於前者交相愛重。乙酉秋。聲言大兵入郡。山寇竊發。君散金棄產。召募壯士。密布方畧。率鄉人嚴飭垣砦。精備楮械。曉夜防堵。賊至皆斂息而退。是時賊氛洶湧。所過靡爛。獨篁南耕鑿晏然。君之力也。乙亥。海兵熾京口。郡營將叛。自星源肅聚屯溪。郡聞賊警。猝至。當事倉皇遣儒官慰諭。賊焰益張。鄉民望風奔竄。彌山堙谷。君與族父老曰。賊志在剽掠。無賴烏合。罕諧行伍。吾鄉須內固眾心。外嚴守禦。堅壁以待。勿為懦者所惑。賊即犯此。擊之必敗。且祖宗祠寢室廬。與俱存亡。去之非義。諸父老姑應且疑。然料郡兵旦夕必至。已而賊偵監司駐郡。寂然作壁上觀。遂乘夜長驅篁南。劈砦而入。大肆焚剽。禦敵者悉遁。君猶伏矢礮設險狹巷。家人環泣促行。君叱之而不顧。方族孽與君有夙怨者。悍為賊偃。必得君而甘心焉。君始見獲。而遇害之慘。有不忍言者。篁南千室數百年之儲粟。君死而與之俱盡矣。使當事能壯君之義。亟應聲援。藉君力以遏賊鋒。而郡之西鄙屠毒。尚可衰止。嗚呼。君之存亡。閭閻之安危。且係之矣。君究心經術。淹洽羣籍。日手一編。不屑以雕蟲小技。屈首呻吟。吾竊榮當世。而吐言揮翰。流迸音藻。老

生風儒對之神聞。至於倔強性成。顯者要人。欲以聲勢相撼。如干將鏌鋌之不可犯。寒素相得。則虛懷傾倒。解襦割繻。所不惜。獨具風負膽幹。勇於任事。疏待匪人。豺狼在腋。而君每養之如犬豕。卒至禍罹巨測。不復行其胸臆。倘命與才偶。志顯於時。曹連因疇之事。固君所優為也。若夫生平受用。風雅豪華。一身兼有。而義風仁澤。流入里黨。難更僕數。迄今父老談及。韶石君乙酉己亥之事。皆相顧隕涕。予交君二十年。無間諠寂。曾幾何時。而元龍之氣。化為蒼宏之血。茲得於白雲滅沒處。解劍吮筆。而為君傳。所謂延陵十字之碑。永作千斛之價。君足當之。尚以俟夫作者。

論曰。己亥江上之事。東南震動。鯀為山邑。賊倉卒起上游。當事持鼠首以觀。莫敢樓鋒。君以布衣毅然奮臂。與封豕長蛇逼爭此三戶之土。遂及於難。是君之死於寢。猶然死於公也。夫以布衣而死公。不無有越俎之嫌。故時論諱之。祇以俟夫後之南史。跡君碧墓。持書而憑弔焉。以慰君之魂魄。悲夫。

義烈吳重光傳

周拱辰

吳重光桐鄉人。其祖質直好俠。與人言依附名教。不善諧俗。重光幼失父。恃其祖成立。祖尋故與幼弟居。祖知書。以家落不竟讀。質直有祖風。而好氣任俠過之。先是光外姑絕愛憐光。苦其貧。出若干金為營衙胥作門戶。一日眾胥剖與例金。詰所自。取告之。故擲諸地。唾曰。噫。此業錢也。安所不得。一盃飯乃從地獄中覓衣食乎。自是絕足不入官。獨行踽踽。人見之腹誹。避去。是時楚豫悉潰。賊益橫。驥駿燕薊。大司農持籌苦仰屋。而水旱迭災。募軍搜粟。倉皇無策。朝廷檄四方勤王者。卒迫邇不肯進。將狡而貪。兵益驕悍。賊來捲甲先遁。賊去則殺良。鬻級抄其家。民至不畏寇而畏兵。時事至此。亦可知也。語曰。兵猶火也。不戢將自焚。夫兵不焚賊而勢將焚國。可奈何。甲申春。官征三餉甚急。擊弟之鄉。理蠶務。完官稅。提匱桑於野。風聞燕京不守。棄匱走入城。聞京城壞然乎。眾雜曰。然。皇帝奈何。曰。與城同壞。帝二子何在。曰。闕業自帝。安所得二子者。捫腹曰。痛甚。遶屋而啼。踰牆入。仰天號曰。一至此乎。小人草命。遙伴皇帝死足矣。作數字押硯底。遂自經。弟以蠶飢桑不至。覓兄不得。入城迹之。鄰母曰。頃聞哭聲。戶出而局如故。可疑也。急排牆入救之。無及矣。視之。其硯猶溼。

外史周拱辰曰。予聞建文末。有東湖樵夫。非紳非士。而湛身清澗。不已甚乎。或曰。率

土臣也。春秋貴義惡不義。彼蓋以所賤與人。而以所甚貴者自予。區區之義。春秋禁之矣。

桐鄉諸節婦贊

予之佐修郡志也。得桐鄉訪婦女之節而存之。室女守制得兩人焉。戴禹功妻陳氏。莊大成妻蘇氏。未婚守制得兩人焉。朱辰宿妻楊氏。朱廉妻茅氏。夫替誓嫁得一人焉。陸廷璋妻倪氏。夫亦貧誓嫁得一人焉。張冲和妻周氏。翁齡守節得五人焉。徐淦妻祈氏。陳敏才妻施氏。朱一豹妻張氏。費可學妻張氏。倪大緯妻嵇氏。陳之值戴歿也。聞訃。謂父母曰。不容往送。當自經也。至則挖尸大慟。翦夫髮及夫爪甲為佩。告舅姑曰。此吾夫也。已遂對屍成夫婦禮。挾老婢與俱卧坐一小樓。四十年如一日。蘇氏則甫十四耳。聞夫歿。毀形褻服。矢志弗易。翁若姑感其義。迎歸守制。拜廟受笄。修婦道終身。楊之歸未也。未婚而夫病劇。翁利其有。給之來。來三月而不成婦。夫卒。遽拜棺成禮。翁姑尋亦卒。力營三墳。皆就緒。茅歸朱。以夫病亦不成婦。侍夫湯藥。祝以身代。卒不起。其翁姑迫之他適。勿聽。諾厲之。飢凍之。亦勿聽。為是悛而止。陸之聘倪也。聞三歲旋替。陸請辭婚。氏大言曰。古有男室替女。況吾天乎。卒歸陸。周氏生四歲。許張氏子。父母死。育於外大父。張酷貧。更許他姓。及長議婚。奔歸抱父木主而啼曰。吾

父在聞字張。張即貧。奈何廢死父之命。挾利刃訴之官。官為動容。得配合焉。祈氏施氏。嵇氏兩張氏。則皆弱齡于歸。皆有子。皆砥礪節。而寄玉于於成。周子曰。烈乎哉。諸。琴。吾師也。且夫甘夫貧以明志。撫後嗣以承夫。詎薄俗能乎。至如朱之子業成進士。母以子貴矣。而曰始念不及此。賢矣哉。子瞻有言。人之愛好而不舍者情耳。男女未室。情復安在。四貞之從一於未字。兩淑之矢志於貧替。自非君子而聞道。何以得此。諸節婦俱桐鄉人。外史氏周拱辰葺之。郡志復為之贊。

贊曰。詩先夫婦。易首乾坤。山川間氣。是產淑人。寒松翠柏。增重人倫。人事紛紜。有榮有悴。燕羽差池。菱花剖碎。從一而終之。死靡悔。鬱鬱閨懿。乃有陳姝。拜屍稱婦。長慟復蘇。祥鸞一羽。是女師模。蘇聞壻變。絕粒不如翁。敬其義。迎歸與處。髮甫燥耳。匪石如許。訛咏標梅。夢中箕帚。曾是童女。而稱新婦。是楊是茅。兩節罕有。倪實名族。素諷江沔。豈以夫替。而輒有它。厲志不回。趙綰絲蘿。烈烈周姬。幼失恃怙。銜刀訴官。不悖死父。甯甘食貧。誰謂荼苦。弱歲子制。藐諸始。冰牀鐵衾。藿羹菜餚。紡鐙訓誨。以啓令圖。祈施嵇張。德隣不孤。邈彼諸淑。倫奩所藏。千古義心。香名正長。

侍郎徐公傳

徐晟

徐公如珂字季鳴別號念陽吳縣人萬曆己未進士除比部以同舍郎建言國本牽連錫五級曾聘河南典房試得士獨多陞南禮部祠祭主事署郎中陞廣東參議攝海道粵夷窺香山私築城百餘丈公隨毀之夷不敢動壬戌大計以卓異陞副使備兵川東道經楚中即聞奢酋變起領樊龍張彤等據重慶公置彌月幼子於荆單騎疾驅而往乞糧糗於黔楚合勁卒於瞿峽進薄城下斬首數千級復躬率選騎奮佛圖關殲賊眾二萬於江干龍彤皆殛死川難既平召拜太僕少卿旋晉左通政轉光祿卿陞南工部侍郎會逆奄鉤黨逮周吏部吳珵擊殺旗尉於是謀及巢卵幾召吳矣公入見同鄉政府顧秉謙曰杓榆可無念耶禍且不測明公將不復能歸矣危言痛切經營委婉於是吳珵得以無知勿罪罪止顧佩章等五人其他興利除害者甚眾公少孤力學家跨塘距城幾二十里每赴文社則袖餅餌自給迄晚脫稿又徒步竟去不累主文家蔬酒以為常後竟以璫禍削奪卒於家崇禎初叙平蜀功贈公一級賜祭葬都人士請於當道特像為祠以祀之顏曰忠仁

論曰君子處小人之道莫備於易之六有以君子顯斥小人而不避其害者象之揚庭是也有以君子陽附小人而徐圖其後者文之若濡是也從前之道為直為顯從

後之道則曲而隱矣。丙寅之役。徵公周旋於政府。吳幾人存哉。以是論公之功。功在百世矣。尤足多者。吳人柔脆不談兵。三百年來。倏無人焉。所睹記韓襄毅孔侍郎而外。與公而三耳。迄今明社既屋。愈思徐公徐公不置云。

霍山教諭龔先生傳

龔先生元祥。字子禎。吳縣人。萬厯乙卯領鄉薦。屢試南宮不第。授教諭於霍山。霍山為僻壤。屬廬州府之六安州。環邑皆山。俗最樸鄙。先生教士。務以忠孝為本。崇禎六年。流賊起秦中。寇中州。八年。薄廬鳳。逼霍山。飢民交走。城守莫備。先生議策於縣。縣無以應。先生曰。致死勿去。吾志也。具砮矢。灰石列城上。歎曰。賊不至幸耳。至則義在守死。子炳衡進言曰。大人職非守土。可以無死。先生曰。吾非敢輕死者。毋乃貪旦夕之生而後日求死不得乎。與訓導姚公允恭砥礪矢以臨危不變。無何。城陷。賊以刃脅先生。炳衡奮身挺賊。身被數刃。先生色不動。賊驚且卻。尋竄聚。執先生縲之去。越一日。勒先生入署取印。先生稽首文廟。起而叱賊曰。此吾死所也。以首觸賊死之。炳衡痛於骨髓。兩肱已折。猶臂支賊刃。厲聲罵賊。賊聚斫之。乃死。夫人遇之而傷。一婢亦斃。賊刃時賊並執姚公索金。姚公曰。死是尋常事。何處得金。賊斫之。血淋漓仆地。會賊括金帛散去。姚得脫回。具棺斂先生及炳衡。復具死難履歷代陳於學使者。後

數日賊復至。姚公仍守正遇害。年已七十餘矣。事聞。為贈官立祠。一時稱特節云。
論曰。孔子云。志士仁人。無求生以害人。有殺身以成仁。仁道之難成久矣。殺身以成
乎哉。顧扶綱植紀。卓爾捐生。為人師教。忠為人臣。死制可以為仁矣。先生苟引武城
避寇之義。似亦可以免也。而嗜義若渴如此。其亦有甚不得已者與。嗚呼。臨大事能
辨義。則知其臨細事不擇利矣。先生具有以諷三事大夫也。

翁烈婦俞氏傳

王鳴雷

烈婦名秀官。閩之融人也。父俞長祚。素有聞譽。逮長以武事死。封疆婦為兒時。讀書常恨非男子。不得從父以死。年十六而歸翁處士鑛。鑛好學。家貧不能卒業。將客遊秦川。以父母老。語其妻曰。余母憂矣。余娶而今且去。苟一旦父母疾將汝倚。且汝必能代我而將其親。使親有孝婦。汝有孝名。無何竟去。去之明年而姑有疾。婦念前語。百聲疾呼。願以身代姑死。及姑愈而鑛客死秦川矣。己亥夏。山間至。先是屋有三鳥。集於堂。其音如鷓鴣。又夜有牛喘於婦前。其日黃昏。婦哭曰。翁即是要盡頭之日也。夜半忽陰雨。從天撲下。婦大哭曰。翁即若者行相見邪。乃徐取所佩小刀。向額喉一剗。氣暈不絕。婦曰。未拜姑嫜。未辭慈母。可乎。乃洗去血。鱗汗者。以左手中指曲剔入旋。以食指側抽喉橫筋。絲絲條淨。觀者為之股慄。婦舅鬚聞而止之。婦曰。兒不孝。使兒得見亡夫。兒願足矣。翁即宜無伯與叔氏者有之。矧其室尚餘婦也。顧謂其似曰。若善事姑母。以余亡。余且瞑目數尺之棺。毋以余身而見恐。母見余而哭。徐謂母曰。兒不孝。負母。將死於夫。則不得不背兒母。若戀兒母。則兒不得死於夫。且不得見兒死。父語畢。鄰媼皆來。婦無愁容。惟取少時所誦孟蘭經。誦畢雞鳴。斥侍兒出。割正喉。血盡氣絕。遽入廳事治斂。且復蘇。吁聲曰。翁即是使余再留耶。則不得一見耶。未幾氣

絕

傳曰。余讀太史公貨殖傳。至巴寡婦清。秦皇帝築臺而禮之。清一婦人。而卒動容於萬乘。又況其烈而死者耶。若翁婦之死。於詩所謂焦仲卿妻者。非耶。然焦之死。死於逼迫。不得已也。若翁則可謂得已而從容之。宜獨情哉。一日干戈無婦人。甯百年禮樂有男子耶。百男子固不若一女子英也。

僅者張三愛傳

張三愛。歟人也。年四十不妻。受役於其主。主貧。或告曰。妻之可乎。張曰。否。愛主在不。竝受他人恩也。主固老。縣令逋租。令索租急。當子杖。愛屢代主受笞。至百數不少。慙愛為人修長。且健筋力。多種蔬。售悉以其資歸。輒充衣肉於主。且曰。王老不忍一日衣肉缺也。獨養母所充衣肉與主同。一日母病。且篤。愛家貧。自度力難置藥。乃乞牛羹於道路。路人曰。若愈母。便可以肝愈之。愛聞而銜之。母曰。女母病而女貧。毋以母慮。遺有餌。留以母身後。質愛涕泣不止。銜涕趨而禱諸神曰。母病人。告我以肝愈我。且以肝愈母。乃出短匕。自剗其胸。五藏皆見。不見肝。復默禱諸神曰。久矣哉。愛之不誠也。須臾。肝墜出。愛急伸右手。以匕割肝。如指許。徐以左手緩緩還。其破肝納於腹。束以白麻。愛以肝歸。和羹奉母。母一飲而輒愈。先是愛恐自昏憤。默祝於神。至是

不大痛苦。明日其兄聞諸醫醫七日而創亦愈。愛主老未受允以弟之子為嗣。嗣為人性黠。罵數恚愛主。受嘗時曰。若事我。我且逝。今我將不為女主而青也。女可使逃去。愛弗肯。事兩嗣如事主。且曰。不敢受主遺墨。輒遽。蓋平人自大也。惟不逸其力。以種蔬植。售又悉給兄嫂。愛嘗與其里人修荒墓之約。凡里中貧乏不能以掩者。更無主暴露者。愛自度貧無力。悉相率其鄰近荷鋤載畚。以封築完固之。勿令頽敗。主子曰。張三愛其王。寢之僮乎。何天性篤樸一至此。所謂禮失而求諸野也。不然。公卿大夫士人白首闕然不能盡者。一賤此盡之。又怪當時公卿大夫無有表而出之者。幾於湮沒無傳聞焉。或曰。刳股刳肝非孝也。吾弟論天下後世人倫得天性之上。貴為王侯。賤為人役。皆可以範圍持正。合於聖人之徒者而止。嗚呼。獨奈何汎汎焉。慟江河之無本也夫。

潯溪文獻序

潘爾襲

志者史之遺也。天下郡國之有志也。其原本於夏書之禹貢。周禮之職方。則志也。而未始離乎經。是故稽分野。則馮相保章之掌故也。考山川。則山經水注之所賅也。紀科第仕宦。而識人物之盛衰。詳風俗食貨。而驗政治之得失。網羅名教。節孝有書。扶植頽風。隱逸必錄。旁諏藝苑。如太史陳風之年。泛列災祥。如洪範五行之傳。其為書也。義類勃舉。淵海而壯風雲。以視夫方言博物。虞初洞冥。諸編猥瑣夸誕。大有逕庭矣。潯溪茗東古鎮也。自予盤桓曹溪。過而喜之。若習有潯者然。洎歲在癸未。一枝託足。潯亦若習有予者。遂稔其事蹟。上下五百餘年間。不難口數。而手繪。因復喟然曰。潯於今日。駸駸乎盛矣。平陂往復。人事何常。自茲以往。天地無終窮。潯之為潯。伊于何底。夫滄海可以改觀。而書記長垂不朽。且予天涯人也。孤雲野鶴。安定去來。昔王右軍守吳興。登歐餘山。酒酣。顧謂賓僚曰。百年之後。誰知逸少與諸君。昇此山乎。因名其山曰昇。即今距潯而西。將五十里。橫亘道旁。層巒縈紆者。是夫未免有情。亦復誰能遣此。因稍為蒐輯。不匝歲。詮次成帙。以其體例近乎志也。遂以名之。雖無當於制作之林。後此而踵事增華可也。其或千載之下。陵谷變遷。憑此以慰臨歎可也。客有譏予者曰。志自一統下訖。郡縣止耳。為闕里志者。以人重也。志鎮不幾偕乎。且殫

九耳烏乎志予曰唯唯否否夫僭不自予昉也遠不具論近若同川震澤各有志矣烏戍青鎮合為志矣如云其細已甚無當一決則且與子啖騶衍之談騁化人之目將蒼烟九點無異著面黑子極而至竺乾氏之說華嚴藏世界淨土香水海則雖四大洲猶不啻滄溟一漚也子又將何所志哉客啞然而笑脫稿竟并為之序順治元年甲申仲冬長至日松陵潘爾巽友龍氏題

國朝文匯甲前集目錄

卷二十

雷士俊

字伯顯陝西涇陽人諸生寄居江都著有父陵集

喪禮論上

一

喪禮論中

一

喪禮論下

二

郝太僕傳

三

邢太乙先生墓誌銘

五

賀詒孫

字子翼江西永新人諸生有水田居士集

程嬰論

六

廉頗論

六

項羽論

七

漢武帝論

八

王叔文論

九

李聞孫詩序

十

國朝文匯

卷二十

國學扶輪社印

遊梅田洞記

十一

譚烈婦八觀記

十一

髯俠傳

十二

僧雪裘傳

十三

周

篆
字福書號草亭江蘇吳江人諸生有草亭文集

趙盾論

十五

淮陰侯論

十五

主客

十六

焦僥

十六

書柳宗元傳後

十七

彭孫貽

字昇仁號茗齋浙江海鹽人

秀水張氏雙節傳

十八

蔡方炳

字九宸號恩圃江蘇崑山人長洲縣諸生前明忠恪公子著有願學齋集

國計論

十九

錢幣論

二十

校刊朱子大全文集書後

二十一

書韓中丞世琦蘇松減賦疏後

二十二

書韓中丞世琦省存餘耗疏後

二十三

馮

景

字山公號少渠浙江錢塘人國子監生康熙己未薦舉博學鴻詞有解春集

秦論

二十四

范增論

二十四

讀柳子

二十五

贈吳征吉序

二十五

山雌集自序

二十六

義士藍九廷序

二十六

仁和陸孝子傳

二十七

貞女陳三淑傳

二十七

奇奴傳

二十八

俞老僕墓誌銘

二十九

顧有孝

字茂倫江蘇吳江諸生徵博學鴻詞不起著有明文英華集松陵文起等集

國朝文匯

卷二十

目錄

二

國學扶輪社印

與吳漢槎書

三十一

金人瑞

字聖敷初名采字若采後改是名江蘇吳縣諸生錄騷南華史記杜西廂水滸俱有評以次序定為六才子書

南華釋名

三十二

南華字製

三十二

序離騷經

三十三

國朝文匯甲前集卷二十

喪禮論上

雷士俊

世俗浮屠破獄之文布穀於地為獄門牆皆具而又畫紙為厲鬼四立而環之乃置人父母之重具間衆僧誦讀佛說一僧手錫畫破其獄為子者號泣辟踊奉重而出如從獄之見其父母也而救之者嗚呼佛之為斯世害極矣吾觀楞嚴雖不免於鑿然佛與阿難富樓那反覆講論剖折蒙釐以自暢其偏指學者不幸而不得遊孔孟之門聞性命之語以得道之正傳一見其書樂其言之堅而辯也雖賢智亦惑之矣至於所謂破獄陋繆無義理而同於戲世之薦紳之徒莫知其非亦從而行之則可笑也始創為此者誰乎誠不仁者哉記曰士庶人有善本諸父母言欲其親有令名也今中人以下得免刑者多矣其犯法而至拘於獄者罪大惡積之人也世之從浮屠而為破獄之事者是以其親為罪大惡積之人也悲夫夫親之端謹無過而誣之與親之不能無過而彰之又從而甚之卒歸無益皆有所不可嗚呼佛之治惑率威脅勢劫以恐喝人而實虛幻不可信者精氣為物游魂為變人之生也氣漸而聚聚而凝結以為人其死也氣漸而散散而僵仆以至於亡亡則魂無不之矣安有塊然者而縛執之患苦之哉司馬溫公謂人生含血氣知痛癢或蚤鬻髮鬻從而燒斫已

不知畏。況於死者。形神相離。形入黃壤。與木石等。神則飄若風火。雖使劉春。豈復知之。其言最為明備。可以覺天下之愚者。吾頗愛之。而世不察也。古禮廢壞久矣。三年喪之制。葬祭之式。歷世既多。大半雜亂漸滅。人莫不不忍於親。而無可以用其情。見佛氏有所謂治喪者。則羣趨焉。曰是可以致吾孝矣。吾謂三年喪之衣服飲食居寢與葬之時。月祭之奠。獻之屬。當會通而增損之。使家喻戶曉。可以盡心無憾。則佛道不禁自止。人之飢也。至於飯皮飯紙。非其嗜之也。飢使之然也。倉有餘糧。豈有餘畜。則啗粟啜肉。雖彊之皮與紙。而不下咽矣。此必然之勢也。

喪禮論中

古之禮繁。今之禮簡。古之禮有其名必有其實。今之禮名不存十之一矣。而名僅存者。實又亡焉。世人從而雜附其見傳之日久。其弊益熾。以至於不可挽。吉凶諸禮莫不皆然。而喪為甚。吾試論之。古斬衰三年之禮。斬衰裳直經杖。絞帶冠繩纓。官屨居倚廬。寢苦枕塊。歆粥朝一溢米。夕一溢米。既虞。翦屏柱榻。寢有席。蔬食水飲。既練。舍外寢。食菜果飯素食。既祥。始飲酒。食肉。復腰斬衰三年之禮。如是則齊衰三年者可知矣。夫錦繡之為麗也。而被之如有利於其體也。羊豕之為甘也。而嘗之如有毒於其口也。家室之為歡也。而遇之如有病於其懷也。先王知其然。於是乎使之斥錦繡。

戒羊豕屏家室定以為制。今之人無故奪其錦繡羊豕家室之適則相與嗷嗷矣。奪者不樂而奪之者亦不樂。先王斷嗜禁欲創為喪禮。古人守之不以為難者。悲切於內而躬安其際也。嗚呼善矣。今則不然。親之始死。惟衰裳經杖帶冠屨不廢而飲食居寢大抵悉準於常。數月之後。輒章甫逢掖以與慶賀。或采服不加於身。又宴樂佚遊。不以為怪。人非不愛其親也。始於一二倣儻狂誕之徒。放言高議。直情矯世。而壞聖賢之制以自便。人樂其便己也。而相與效之。效之者日多。聖賢之制日益壞。世之人乘其敝乃無不為耳。目習貴狃為當然。雖有孝稱者頻頗不甯。亦懼世之指詈而無以自拔於流俗。此其可歎也。嗚呼。喪禮之復也難矣。喪衰戚之隱也。行立坐卧而不忘乎哀戚。其文繁其事難。此夏殷之隆也。三月不違仁。顏淵之學。冉閔而下不可語矣。而三年之久。聲色美好之屬。無所動其念。進退升降。一依於禮。如順水之舟。無待勉強。此中心安仁。天下之一人也。由唐宋而視秦漢。邈乎遠矣。而繩以夏殷之隆。彼所謂士。凡庸委瑣。同於工商。而望以中心安仁。天下之一人。喪禮之復也難矣。雖然。君子之所謂師古者。師其意也。孟子陳井田。畫地經野。更張紛紜。歸於潤澤。夫潤澤者。變而通之之義也。觀其與滕文公言。止於齊疏飭粥二大者而已。識此可與言禮矣。今夫衰裳經杖帶冠屨。既未盡廢。而飲食居寢。可裁以先王之意。由虞而練。

而祥。自重殺之以至輕。使其不違衆。不拂理。儻之流俗而無駭者之聖賢而無愧矣。為不可哉。德之盛者。於人不必求備。先王定制。令過者俯而就之。不至者跂而及之。後生小子。喜於苟且。弛懈自恣。過此者少矣。而不至者講說浸灌。循其性之所近。俛焉孳孳。自勵於此可也。喪禮廢久。如吾說用。其復也庶可幾乎。古今相去遠甚也。竹策篆書。易以紙而尚隸。豈可同哉。拘禮而禮亡。得其意以為之。不屑屑於細節。而大體未嘗不存。此孟子所謂潤澤也。而人之致力於禮者。雖一端亦有所益。若其孔步孟趨。周還中規。折還中矩。則豪傑可以為百世法者也。

喪禮論下

今之葬無定期。遲緩者或五六年。或十餘年。甚至數十年。子孫累傳。而後葬其祖父。母曾祖父母者。世俗之大失也。然則當於何期葬。記之所云是矣。三月而葬也。國子高曰。葬也者。藏也。喪遲緩不葬。是死無以藏也。死無以藏。可謂得其所乎。人之死而墳墓也。猶生而宮室也。今夫人露棲野處。則憂寒暑之患。風雨之苦。四體脆脆。而心志拂鬱。以生推死。勢異道同。且人雖近而三年之外。必有其冠婚慶賀之禮。既有冠婚慶賀之禮。則必有絲竹燕饗之節。以喪在殯而罷之。是廢冠婚也。懼廢冠婚而不罷。是喪殯未葬而樂也。晉荀盈卒於戲陽。殯於絳。未葬。晉侯飲酒樂。膳宰屠蒯趨入。

曰辰在子卯謂之疾日。君徹宴樂。學人舍業。為疾故也。君之卿佐。是謂股肱。股肱或虧。何痛如之。大臣之喪。殯未葬。君飲酒樂。屠劇猶有譏。況其上焉者乎。今世俗遲緩成風。或難盡如古三月而葬矣。三月之後。大祥之前。其擇而行焉。不可以有踰者也。或者難曰。今之久而後葬者。非敢怠也。蓋待於天時之利。求於地理之善也。子責之。其何不思乎。曰。儒者知親之生而事死而葬已矣。僥倖小人。乃有拘於天時地理。以冀得富貴者。非儒者之所尚也。君子行一不義而得卿相不為。而暴其親之遺骸。以求貴富乎。如世俗之惑。而惟是之信。則大祥去屬纊。凡二十五日。天時地理必得其吉。而可以葬者也。古之君子之盡於其親者。何有禮也。其居喪也。始沒朝夕奠。將葬祖奠既葬。而虞既虞而卒哭。期小祥。小祥之祭。再期大祥。大祥之祭。中月而禫。禫祭其免喪也。春夏秋冬必祭。夫喪莫約略無文。陳饌酌酒而已。猶未及乎三獻與侑食也。自虞逮禫。三獻繼以侑食矣。猶未及乎受胾與餼也。至春夏秋冬之祭。則三獻而侑食而受胾而餼。彬彬情儀悉盡。由此言之。春夏秋冬之祭。全具為祭矣。虞雖變而之吉祭。未正其為祭之禮也。而世俗於居喪。不當吉祭而遽吉祭。其免喪後當吉祭而又不吉祭。遂至終其身。子孫與祖考絕不相接者。廟不立而祭之禮不講也。嗚呼。古之宗法亡矣。所恃糾合乎子孫者。惟春夏秋冬致祭。子孫羣集。則相親相親則冠。

婚必告死必訃有善相勸有過相戒今五服之親疏遠如路人平昔殘很不肯往來有忿則聚而為訟以爭銖兩之利廟不立而祭之禮不講豈獨薄於祖考哉而於祖考薄者此尤可痛也

郝太僕傳

太僕寺少卿郝公景春者江都人也字自古公始字和滿或謂公曰噫子不善今術公笑曰今有術乎吾乃從今矣公別號際明更號乃今頃之喟然歎曰吾終不能隨今以俯仰又更字自古公中萬厯壬子應天鄉試會試數不中除鹽城縣儒學教諭貶陝西苑馬寺萬安監錄事擢黃州府照磨遷房縣知縣公節義得於天性平生嘗曰世之腐拙棄我天下事必我腐拙者而後可為也公喜作詩歌雖酣醉戲謔皆歸忠孝暇則以訓誡其子聚俳優佐酒輒好觀楊忠愍行迹素不作序獨為忠愍年譜製序閒居一日啓篋見泰昌錢而涕下指以告其子曰此聖明天子也公之節義蓋天性也賊魁張獻忠之措置於襄陽之穀城也授以遊擊將軍所謂西營八大王也當是時鄖陽之所措置者九營而房居其三羅汝才屯於東以及南北謂之曹操營白貴屯於北以及東謂之小秦王營黑雲祥屯於西謂之整十萬營是時朝廷從大臣言屈意安撫公獨主殺賊羅汝才白貴黑雲祥三營一日迫房城公擊之多所斬

賊懼訴於上官。上官數責公。諭以朝廷嚴旨。公乃改圖安撫。單騎到營。與結盟約。畫疆界。遇以誠信。三營畏懷。而獻忠叛破穀城。大肆劫掠。乃率衆圍房。時房兵少。倉庾空虛。賊基布於境。諸府聲問不通。遣使求援者。盡為賊獲。公乃書寸紙繫卒足。偽飾乞人以行。凡四請。終無一兵應者。公同其子鳴鸞督兵固守。部署僚吏鎮將使守門。而賊攻城掘墓。剖其棺戴首。公令城上然草下焚投石。死者凡二三百計。又設大礮。雜以小銃。躬臨監用。斃三四隊長及數百人。獻忠有一花馬愛之甚。出則常騎。亦死賊掘城。輒以火焚油灌之。賊立梯登城。輒以鈎引踏梯。獻忠巡視攻不盡力者。自刃其頸。而公亦懸錢以定賞格。曰。擊中賊一人者。授錢一千。中者輒授民。莫不奮勇。志在殺賊也。相厄五晝夜。獻忠大恨。然無可為。欲解退。而指揮張三錫縋賊而城陷。張大經冠紅纓。乘白馬。手短槍。入曰。知縣何在。大經者。故九省監軍也。降賊為賊指。示方畧。頃之。獻忠亦至。公面仰向交臂。顏色莊厲。獻忠讓公。公與獻忠辨。而羅汝才使數十騎擁公上馬去。至營。汝才哭謂公曰。事勢如此。奈何。公曰。無害。時鳴鸞與公相失。夜將半。大雨。遲明。鳴鸞至。見公哭。公呼鳴鸞謂之曰。男子不幸至此。唯有一死耳。乃以手畫頸曰。此豈甚痛。鳴鸞亦輟哭曰。吾所懼者。父子離散。今既聚矣。死非所難也。汝才從容說公降。大經以監軍而降。心愧之。欲得公降。以故嗾獻忠使汝才說。

公公不應汝才知公不可屈欲曲活公令暫避之公曰天下有避賊知縣乎乃與奴陳宜往見獻忠辭益倨獻忠怒殺其丞以懼公公罵曰奸賊又殺一帥公罵不已大經教公觀變公曰何謂觀變大經不應獻忠指大經叱公曰彼九省監軍始見如何恭謹汝一知縣而若此乎公曰彼雖監軍彼已降賊不直一錢吾雖知縣吾不從賊也獻忠與大經盛怒叱曳公出公大罵大經曰汝受朝廷厚恩官職何尊乃與賊為伍我死必不怨汝時鳴鸞亦至公遂見殺鳴鸞抱屍大呼曰死賊何不殺我賊抽刀殺鳴鸞因殺宜鄖陽諸縣皆有山寨先時賊至諸縣知縣挾印乘寨以免罪戍邊公曰丈夫死則死耳成何為者獻忠圍房大經亦以書勸公乘寨捐城與之公曰汝欲招降可屯城外俟我上請若欲入城老郝不許也城陷死之都御史御史以其事聞上贈公太僕寺少卿建祠江都春秋致祀鳴鸞宜附鳴鸞之兄公長子明龍陰入國子監初公之詣房也鳴鸞從明龍留於家

論曰自流賊擾亂天下苦兵者十餘年郡破邑亡者不可勝數也封疆之臣牛酒迎敵者有矣而棄城遠逃者多奮然以身殉者未之聞及觀房陷郝氏父子皆死若是乎其忠且壯也家奴陳宜亦就死而無畏色則奇矣論十餘年以來斯人之高下吾必以陳宜居薦紳先生某某之上嗚呼如薦紳先生某某者將何以處之哉

邢太乙先生墓誌銘

先生諱大信字順甫別號太乙姓邢氏涇陽人幼聰慧把筆出語驚人十六入縣學十八提學權第一補學生缺每試輒第一知名關西萬曆天啟間士白首專四書及所占經講習舉業以希祿利而已先生獨準古作者製為狀記傳箋諸大篇三水文太青以博學為海內所宗甚奇其才而居鄉場屢試不中年四十乃歲貢於學除太康教諭攝洧川縣調莊浪教授遷瀋府教授棄去益肆力於文其文老更健某年某月某日卒將卒為游仙詩曰青鳥儵而至殷勤前致辭歸來太乙子桃熟已多時享年九十有一洪永以後科目重卿相無不出於此塗而士纔弱冠持方尺之紙取之如寄士之魁梧雄傑者沒齒顛頓庠序多矣先生之才世咸推許自臺省迄守令咸願與之交而竟不能舉於鄉先生之在太康也河南提學根遂曹公燕見先生而問以姓氏先是曹公父墓誌銘屬先生所撰稱其有西漢風指不知為先生也先生具告曹公愕然竟欲致先生科目會河南鄉試教職例得應試公徧諭有司之分試者以先生到場欲其留意教職庶幾一當凡中數教職而先生不與老於歲貢以教授終其子祥中順治丙戌舉人知金鄉縣乃贈金鄉知縣然先生才高失志胸亦鬱鬱不平頗倨侮其在莊浪也土官魯某擁兵十萬勢焰赫奕照灼學舍淡薄類趨拜階

下卑諂以乞升斗。先生厲色抗禮，絕不顧。而先生工文，亦長於政理，治涪川有威愛。巨猾潛匿，土官遽指以捕。先生召隸署其臂，立擒獲。先生行，百姓泣止不肯捨。先生政理優裕而限資格，其張弛祇如此。曾祖諱某，祖諱某，父諱某，初娶王氏，贈孺人。繼娶丈氏朱氏，子男五人，清府學生允儒，士祥，其三也。欽慎縣附生清允，蚤死。女二人，孫男五人，孫女四人，曾孫三人。先生任氣好俠，李自成索餉秦中，諸搢紳刑戮慘刻，呂某窘極，跨一羸一僕步隨投先生。先生館食逾歲，以故脫於害。先生事親孝，親沒蔬果薦而後嘗，忌日不樂。奉兄謹，弟有過杖之。某年某月某日，祥等葬先生某所，而以孺人王氏暨丈氏附，余為之銘。銘曰：

先生著述揚名秦川，考其繫譜肇自河間。爰徙及涇，亦久歷年。由祖逮禰，世受一廛。先生崛起有道而文，援筆謳吟，宏章百篇，頻別於鄉。數奇屯遭，兩經教職，卒以王官。我紀其績，涕淚潺湲。

程嬰論

賀貽孫

趙武得復立為趙氏後。程嬰乃辭諸大夫曰。昔下宮之難。公孫杵臼死。我非不能死。我思立趙氏後。今趙武既立。我得以成事。報杵臼於地下。遂自殺。或曰。趙武既立。嬰可以無死矣。嬰之自殺。豈非所謂傷勇者歟。賀子曰。此所以為程嬰也。夫嬰之死。非欲報杵臼於地下。乃欲以信趙武於國人也。當嬰與杵臼謀取他人兒。令杵臼負而匿也。嬰謬取屠岸賈諸將千金。而告以孤處。杵臼抱兒哭曰。孤兒何罪。獨殺杵臼可耳。諸將不許。遂殺嬰。兒杵臼死焉。當是時。舉國皆謂趙氏無遺種矣。嬰獨攜真孤匿於深山者十有五年。無有知者。一旦景公聽韓厥之言。復其故位。而舉國不疑者。特脅於韓厥之衆耳。夫以十五年山中之兒。出承趙祀。攻屠岸賈而滅其族。不於此時設奇制變。而貪戀餘生。苟圖爵賞。藉令景公韓厥卒。然有故岸賈之黨。羣起而搖之。指杵臼所死之兒。與嬰所取之金為辭。嬰安能舉前後兩孤。喋喋焉辨其真偽哉。嗟乎。成方遂之稱衛太子也。王郎之稱子輿也。彼天子之子。尚有矯託者。況卿相久絕之孤。而能通國信其無他。此不可幾之事也。自有程嬰一死。以報成事於杵臼。而後曉然信趙武之為真孤。又曉然信杵臼所以先嬰而死者。皆有功於趙氏也。所關豈不重哉。然則程嬰前之不死。所以存趙武也。後之必死。亦所以存趙武也。以不死存

趙武者後人所知以必死存趙武者後人所不知也其不知者未嘗設心居嬰地令設心以居嬰地而後知嬰必不在可以死可以無死之間矣為報成事於杵臼而死則可無死為信趙武於國人而死則不可無死趙武一日未立則可無死趙武既立則必不可無死而其不可無死之故終不可告人姑謬其詞曰報成事於杵臼云爾然則豈惟後人不知當時國人皆不知也豈惟國人不知趙武亦不能知也至國人與趙武皆不能知而後嬰之所以存趙武者愈堅而所以信趙武於國人者愈深且遠矣後百有餘年有漢賈高之死其用意亦有足多者焉方趙王以反捕也同謀皆自劉高獨罵曰公等皆死誰白王不反者遂對獄榜笞剜劓終不言王反於是上出趙王且賢賈高欲用之高曰吾所以不死者白王不反今王已出死不恨也於是自殺夫趙王既出高可以無死而死焉豈非傷勇哉高意不然以為帝之疑王深矣吾雖以不死白王然世豈無匿情忍死市義於王者乎吾死而後王不反之跡愈白而無疑矣夫前之以不死白王不反人所知也後之以必死白王不反人所未知也吾是以與程嬰皆表而出之以明古之豪傑可以無死而必死者誠非無意而淺夫乃以世俗之見起而議之其蒙屈地下者可勝道哉

古之大臣當強敵憑陵之際蓋有必然之防焉。又有不必然之慮焉。有必然之防。故其備盜有不必然之慮。故其圖周備密而圖周。然後粹然臨事而不驚。無故變生而不亂。昔者秦昭王誑趙約與趙惠文王會於澠池。王與廉頗藺相如謀行。則恐受欺。不行則示趙弱。乃威為之備。令藺相如從行。而以廉頗居守。廉頗送王至境。與王訣曰。王行度道里會遇之禮畢。還不過三十日。三十日不還。請立太子為王。以絕秦望。王許之。及至澠池。秦知趙威設兵有備。會畢不敢有加於趙。君子是以知廉頗非僅行伍中人也。殆有古大臣之風矣。夫國家所最患者莫大乎以君與敵。而復與敵市。君也。吾無君而求君。則敵必以君為市。及吾有新君而復求舊君。則敵必以吾舊君為市。吾不求舊君而舊君自求入焉。則敵必納舊君以與吾新君為市。展轉相市。地削民疲。是不戰而國自亡也。今廉頗既與王訣而許之矣。即不幸而有變。奉舊君之命立新君以絕秦望。則前之三患俱亡矣。又況其行而有備也。既防其必然。又慮其不必然。秦雖欲誑趙而不可得。此頗之所以為大臣也。其後秦昭王復以誑趙者誑楚矣。武關之約猶澠池之會也。楚懷王信子蘭之言而行。秦詐以一將軍號為秦王。劫懷王入秦。設令是時楚臣有如廉頗者。能以與趙王訣者。訣於楚王。王必狐疑不行。即行而有備。王必不陷而入秦。即陷而入秦。而王既許楚臣立新君以絕秦望矣。

必不求歸而以巫黔中之地許盟至走死秦地而楚禍不解也楚之諸臣不為其備而聽其行是猶制虎者無救傷之具輕身以當其搏噬其愧於廉頗也多矣猶幸齊人歸楚太子橫得立為王又幸而懷王死楚人曰賴宗廟社稷之靈國有君矣楚無求於秦秦亦不能挾舊君為市者是昭睢諸人之後計得也吾獨怪南宋諸臣既立高宗矣猶令敵人得挾二帝為市屢和屢爭屢盟屢叛是不獨有愧廉頗并昭睢諸人之不若也悲夫

項羽論

韓信謂漢高帝曰項王為人喑啞叱咤千人自廢然不能任屬賢將此特匹夫之勇耳項王見人恭敬慈愛言語嘔嘔人有疾病涕泣分飲食至使人有功當封爵者印刳弊忍不能予此所謂婦人之仁也君子曰項羽之所以失天下者韓信已觀其深矣夫匹夫之勇婦人之仁似非可同情而論也匹夫之勇其失天下易見而婦人之仁其失天下也難知然惟其為匹夫之勇是以成其婦人之仁何也凡人之情易怒者尤易悲而悻悻然有一朝之忿者及其大事當前反循循然優柔而不能斷此無他故患在不忍焉耳古之人有大不忍而稱勇者一怒而安天下之民是也有大不忍而稱仁者救民於水火是也夫惟聖人能以大不忍之心行大不忍之事自非聖

人。凡有大不忍之心者。必有大忍之力。以濟之。所謂大忍之力者。非以忍吾之所忍。蓋將以不忍吾之所不忍也。白刃加於頸。見流矢則忍之。非忍流矢也。為其所不忍者。有甚於流矢者也。螻蛇螫手則斬手。螫足則螫足。非忍於手足也。為其所不忍者。有大於手足者也。古之豪傑英雄。所以深沈凝固。以成天下事於一旦者。不過能忍而已。而匹夫婦人。不然。不忍於事。則傷於勇。傷於勇。則其所為勇者。不過啞啞叱咤而已矣。不忍於情。則傷於仁。傷於仁。則其所謂仁者。不過言語嘔嘔。與人涕泣。分飲食而已矣。何則。其所不忍者小也。所不忍者既小。則其所忍者必大。至於所忍者大。而其敗有不可勝言者矣。項吏之辱不能忍。而於終身之媿恥。則將忍之一戰之敗。不能忍。而於社稷之傾覆。則將忍之。一人之怨不能忍。而於黔首之塗炭。則將忍之。亦惡在其為不忍哉。項羽憤田榮之反。齊欲以全力殲齊。使漢王得以乘間定三秦。據敖倉。取滎陽。而不顧也。憤黔布之反。九江自留下邑攻而破之。使漢王得以乘間收散卒。據咸陽。而不顧也。不忍小怨。而忍大讐。此其所以為匹夫之勇也。項羽夜坑秦兵二十萬人。屠咸陽。火三月不絕。及漢王身在掌握者數矣。憐而不殺。忍於降卒而不忍於仇敵。忍於二十萬人而不忍於一人。此其所以為婦人之仁也。身敗名滅。為後世笑。豈不宜哉。昔者勾踐能忍會稽之恥。身執繫匭。妻執箕帚。凡二十年。而漢

高帝亦能忍楚陽成皋之敗。堅壁持久。以老楚師。然而行成之請。夫差不忍殺勾踐。而勾踐忍之於姑蘇。鴻門之會。項羽不忍殺高帝。而高帝忍之於垓下。劉項成敗之機。固於忍不忍之間決之矣。

漢武帝論

老氏所謂法令滋章。盜賊多有者。豈真法令之咎哉。誠見夫為法令者。不弭盜賊而佐盜賊。為盜賊者。不畏法令而詭法令。盜賊與法令。兩相困而兩相勝也。當漢武建元之初。天下幾治。其後天子任法。廷臣救過不給。僅取充位。張湯斷獄多傳古義。其深刻者皆依文學。蓋自酷吏出而漢之人才已空。儒術已雜矣。彼豈不以武健嚴威可以勝天下之奸民。而不知奸民之不可勝也。其弊有二。一在以法令為匿奸之數。何謂以法令為匿奸之數。天下良民多而奸民寡。善為治者坊之以禮義。廉恥藏奸民於良民之中。使不為大害斯已矣。非求有以勝之也。自武帝用張湯義縱杜周楊僕滅宣張禹尹齊王溫舒等為公卿。始欲有以勝之矣。天下二千石承望風旨。倡為嚴酷。遂有鋸頂暴挫諸刑。皆以決囚為解脫。以多殺為名譽。於是奸民無所併容。爭為酷吏耳目。鷹擊毛鷙。以媚酷吏。如義縱守定襄。奸宄佐吏為治。王溫舒在關中。豪惡悉進為用是也。夫用酷吏。將以勝奸民也。乃一酷吏在郡。而數什伯奸民叢以為

暴是一郡而有數什伯酷吏也。奸民未見勝而良民已受禍。是則以吏民相繩。為上下交通之術也。一在以法令為救死之具。何謂以法令為救死之具。當文景之世。民樸畏罪。天下百姓戶可封也。自武帝尊顯酷吏。流血千里。四海騷動。羣盜大起。攻城殺吏。幾成亡秦斬竿之禍。天子使吏督捕之不止。復使繡衣持虎符發兵擊之。又不止。乃作沈命法曰。盜起不發覺。及發覺而捕不滿品者。二千石以下及小吏皆死。至此而武帝所以求勝於天下者。凡四變矣。以為文教不足以勝天下。變為酷虐。酷虐不足以勝天下。變為督捕。督捕不足以勝天下。變為勦討。勦討不足以勝天下。變為連坐。四變而四不勝。天子用法之意愈窮。而奸民避法之意愈巧。於是小吏畏誅。雖有盜不敢言。大吏亦令小吏勿言。各以文辭展轉規避。文辭益繁。盜賊益熾。倚吏阻兵。大禍不止。然則法令者盜賊之庇蔭。而酷吏者盜賊之憑依。是又以吏民相察。而為上下相蒙之術也。嗟乎。法立而奸民淫意於法之外。法嚴而奸民竄意於法之內。令重則奸民之犯令滋輕。令密則奸民之漏網滋衆。吾以是知法令所以不足以治天下者。欲求勝於天下也。

王叔文論

作史者衡千古公論之是非。而不徇一時私情之喜怒。則善矣。吾於王叔文而竊慨。

唐順宗時史官之失實也。順宗賢主也。史既稱其在東宮常侍德宗。言裴延齡韋渠牟之奸。每當敷奏。不假宦官顏色。其待羣小若是嚴也。而又言其即位遽昵婦寺。使叔文得與內侍李忠言昭容牛氏朋比為奸。是何前後易轍若是速乎。德宗猜忌不君。史既言之矣。順宗為太子。語及時政。叔文曰。太子侍膳問安而已。勿與外事。有如下陛下以收人心見疑。何以自解。而又云叔文蒙幸太子宮。以撓國政。夫東宮既不與外事矣。東宮之人何由撓國政乎。叔文侍太子時。陰以百姓疾苦入告。史既稱其初即位時。即罷宮市。禁五坊小兒戲。免進奉及各色進賦。天下欣然。而又云當時道路以目。豈有貞元遺虐。翦除已盡。而尚結怨聚。患於道路乎。德宗以貞元乙酉正月崩。順宗即位。至秋七月。憲宗監國。旋嗣大位。計順宗在位不過六月。而叔文為學士。未幾遽罹母憂去職。煬竈藉神。曾幾何時。史何不於六月內直數其與八司馬所為不法何事。但云蹤跡詭秘。汲汲如狂而已。將何以服人心乎。陸伯冲通經學古。有功夫春秋。所稱文通先生是也。恬淡寡欲。官止侍讀。史乃以躁進列八司馬之首。柳子厚劉夢得。天下奇才也。史譏其伊周管葛。互相推許。遂謂叔文外倚奸回。以攘大權。夫人臣以伊周管葛相許。而稱奸回。豈以林父國忠相期。乃為忠直乎。德宗朝。匱乏者財賦也。叔文以財為國本。知杜佑賢。薦領度支鹽鐵。而史謂叔文欲以已副而揣其權。

使叔文果欲崇權則當時聚斂小人如李實輩因而用之可以自恣今既遂實而用佑矣猶欲從賢者之後崇權媒利不已謬乎唐自明皇以來握兵者宦官也叔文薦范希朝掌神策軍以解其柄使此法不變則唐之社稷未易亡也史乃謂其集宦官兵以自固使果欲自固則陰連北司互為黨援可矣奈何結怨樹敵以讐宦官乎殺叔文以快宦官并以兵柄歸宦官以釀甘露之禍而史為叔文咎何也唐之中葉所逆命者藩鎮也韋皋在西川命副使劉闢求兼全蜀且曰公如不與必有以相酬叔文欲執而斬之使劉闖既斬宜煩高宗文之討乎宰相不可縱闖使歸而韋皋掃除君側之奏至矣是年皋死劉闖阻兵稱留後次年求兼全蜀舉兵遂反殺叔文以驕叛人使強藩得執人主進退之權以成昭宣之變而史猶為叔文過抑又何也凡此數者豈非史臣徇一時之喜怒而不衡千古之是非者哉雖然叔文則固有以自取矣古之人臣將欲有為於天下必先度其身次度其君次度其時與勢叔文雖嘗讀書明治道乎然進由奕術官無勲勞資微望輕輿情難協則非有為之身矣順宗因賢主乎然風疾失音深宮決事猜嫌易生則非有為之君矣又況天步艱難奸庸滿朝德廟顧命無復大臣陸贄陽城就徵而卒老成凋謝新進未洽則非有為之時與勢矣叔文既昧於自度而柳劉諸賢又以年少才高勇於圖治當時斗筭齷齪之倫

謀望不遂。輒興大謗。嗟乎。使叔文而小人也。尚當於柳劉諸賢。棄瑕錄瑜。叔文既非小人矣。乃以比匪之罪。橫加柳劉。并及伯冲。尚得為公論乎。吾獨惜元和歌詩。首重劉白。大唐文章。並尊韓柳。夢得之詩。姑置勿論。至於子厚。竄逐之暇。能以山水發其天懷。怨尤憤怒。不形於詞。柳氏遺愛。深入心腑。可謂賢且達矣。迺後之讀史者。一則曰。貞元邪臣。再則曰。叔文死友。論詩則左劉而右白。談文則抑柳而揚韓。然不能明指四人之優劣何在。而但曰。叔文之黨華而不實者也。棄其人。并與其人之詩與文而并廢之。蓋史官徇一時之喜怒。而後人又徇史官之是非者也。嗚呼。傷哉。

李聞孫詩序

余猶及見李忠文先生也。己卯夏五。先生以元僚重望。講道螺江。宮牆高峻。苟非其人。不敢望見顏色。顧獨知余。適余出赴郡試。先生命其門人曾堯臣曰。我欲識賀生子。盍為我致之。至則與偕來也。堯臣傳命。俾余執所業為贄。清晨叩門。已有軒車數十輛。填塞街衢。懷刺溫券。趨謁恐後者矣。先生悉辭焉。獨延余與堯臣兩人。握手升堂。促席而談。且曰。賀子方有名於世。世將求全於子。子為諸生時。即擇正而從焉。出而應世。無所不正。子其為天下全人哉。余受教唯唯而出。無何。先生起。掌南樞。尋遷總憲。甲申三月。遂殉社稷。欲復彷彿音容。不可復得矣。爾時先生之冢孫聞孫。方壯。

門讀書。余亦結茅深山。途窮道棘。不得過訪。而余已老。且七十矣。甲寅孟夏。余卧病。浹旬。忽接聞孫手書。并詩一函。余扶杖躍起。病為霍然。及讀諸詩。見其沈鬱矯健。激昂頓挫之概。已足廉頑而立懦矣。而又原本忠孝。傷榛苓而泣禾黍。余乃把玩流連。有感於乃翁忠文之言也。昔者唐太宗得良弓以示弓人。弓人不許。曰。木心不正。所向必偏。及見架上故弓。曰。此良弓也。其木心正而理直。此先生擇正而從之旨也。越王以豪曹之劍示薛燭。燭曰。曹徒擅名。不為寶劍。及得耶谿之鉞。鑄成示燭。燭曰。此寶劍也。五色並現。各不相勝。不可指名。其名乃全。此先生名下求全之旨也。今聞孫之詩。夫既原本忠孝。則固無所不正矣。且原本忠孝而出之。以沈鬱矯健。使人興觀羣怨。事父事君。隨感而遇。則固幾於全矣。以是為弓。則烏號也。神臂也。谿子少府也。以是為劍。則湛盧也。干將也。龍泉太阿也。以是為詩。則采薇蓼莪。離騷之苗裔也。由忠文正與全之旨。而讀茲編。然後知先生之諄諄於貽孫者。蓋已於忠孝正直之中。默誘我於風雅之林。宜聞孫之過庭學詩而有得也。

遊梅田洞記

遊之道有三。於東山取曠。於康樂取豪。而子厚取幽。取寂焉。斯備矣。邑東二十里為梅田。從田中空起石洞有三。玲瓏空幻。奇怪秀特之態。飮人耳目。遊人騷客。豔稱之。

茲不具紀。紀遊焉。蓋嘗屢至其地矣。憶兒時偕數少年。躡屨尋穴。舉燎而入。直達突
隧。淒神寒骨。自喻適志。以為樂也。癸未八月晦日。偶與釋大治。過友人龍仲房家。飲
醉。乘興遊焉。仲房善謳。治善笛。按笛發謳。嗚嗚啾啾。進出石竇。眾竅迭應。破石穿崖。
引而愈長。謳闕。忽有弁而騎者數十人。擁戈鳴角而來。下馬張樂。樂在洞上。其聲在
下。如墜如崩。既而馳驅田野。懸的習射。箭落鵠。角鳴馬嘶。皆與三洞聲相吸應。忽
焉內洞礮發。石遏響留。其聲鬱怒。百穴盡怒。如獅虎羣哮。如海潮疊震。如有百十霹
靂交闕穴中。排擊衝突。良久乃已。遂鋪茵羅坐。邀余三人為上客。刺肥烹鮮。痛飲至
醉。揚鞭散去。仲房顧謂余曰。今日之遊。意曠而致豪。境幽而神寂。彼弁而騎者。助我
樂興不淺矣。不識彼亦知此樂乎。余曰。亦各有其樂也。雖然。子厚氏不云乎。永州山
水。凡有異態者。皆吾有也。永州山水。閱人多矣。而有之者。獨一子厚。前此者不得與
焉。子厚去今千年矣。讀其書者。鉅鉏小邱。仍屬子厚。後此者終不得與焉。今茲之遊。
吾三人將何以有之哉。有以有之。則斯洞與吾三人共存千古。無以有之。則彼弁而
騎者。其自視鼓角。喝咤之聲。與吾黨之謳吟絲管均也。嗚呼。梅田之為梅田也久矣。
孰有之哉。遂相與賦詩而退。

宋季永新鄉進士彭震龍帥八姓忠義從文信國勤王信國兵敗震龍猶固守永新同邑叛人劉槃者初仕宋為大將降元引兵屠城震龍等皆死之是時譚婦趙氏夫婦聞變抱其三歲兒隨舅姑匿學宮元兵至殺舅姑及其夫欲汙趙氏趙氏憤甚抗聲大罵賊怒殺之并刃其子血流聖殿八軀若婦人抱嬰兒狀時元十四年七月十九日也有屠者伏梁上出為人言甚惡久之有司謁學宮見血軀滌之不去磨以沙石又不去復煨以猛火乃更鮮明其後明季知縣某以歲久軀壞築土和灰石以埋之其厚三寸須臾血痕出塋上如前狀至清順治庚子知縣王登錄復加塋焉厚倍於前塋血痕復出新塋上如前狀時已閱三朝四百餘年矣余乃覩八軀而慨然歎也方元兵之下江南也駭駭騰雲旌麾蔽日雷轟電掃海沸山搖豈非一時蓋世之雄哉然何以力足以斬炎宋磐石之宗而不足以折閭閻芳烈之氣勢足以遏錢塘滔天之潮而不足以滅升斗濺地之血威足以屈二百州厥角稽首而不足以禁一婦人切齒咋舌則是江南已亡豪傑已死而趙氏之心獨不死也夫惟趙氏之心不死是以趙氏之血不磨還想其時慷慨之情憤罵之狀蓋已震天地哭鬼神貫金石而薄日星矣八軀淋漓豈偶然哉嗚呼傷矣火德衰矣元運新矣北轅駕矣南舟覆矣彼亂臣賊子附綴助虐以為聲靈與天無極也豈知轉盼八十年欲求奇淫溫

帝蹟雄圖於沙漠。宮廬間但有朔風積雪。凜人肌骨。而彼伯顏張宏範諸人。功業旂常。甲第鐘鼎。鐵券帶礪。已與煙草同其銷沒矣。若所謂叛人劉槃者。不但人骨俱腐。并其子孫亦自削其家譜名字。以滅人耳目。獨此八顆殷殷斑斑輝耀學宮。千秋萬世傳之無窮。然後知彼時幅員之壯。兵威之強。以八顆視之。不過劍首一呿。蟬蛻一瞬而已。後之亂臣賊子。過我宮牆。徘徊八十之間。其尚蹶然動心也夫。

髯俠傳

髯俠事有為之傳者。不如楚人周君岐言之詳也。君岐曰。髯武昌舟子。不告人鄉里姓名。髯長尺許。分五髻。甚美人。呼為美髯公。目光如炬。獨操一舟往來吳越間。崇禎時。楚黃陳大巖者。有文名。訪友於金陵。賃得髯舟。見髯貌。怪之。既登舟。鼓棹如飛。暮宿見水牛十餘頭。浴於江。妨泊處。髯以左右手各持一牛蹄。擲岸上。如投鼠。數擲而盡。其行止隨意。不擇地而泊。每至孤舟荒嶼。急灘迅流。留連而止。大巖患之。髯曰。吾舟所至。海倭所不敢犯。陽侯所不能怒也。君何怯焉。每過壇廟。輒詬責鬼神。叱咤不休。忽大巖見舟尾幔內。有二八女郎。嫺雅似仕族子。益怪之。而未敢言。一日曉起。推蓬遙望。風吹酒帘。有惠泉字。顧謂髯曰。而能為我市酒乎。髯曰。諾。即索百錢去。大巖起。招女郎。問曰。汝誰家女。胡從髯游。髯何人耶。試私語我。我能脫汝。女泣然曰。

妾杭人。從父宦於粵西。官歸舟次湘潭。盜夜劫舟。殺妾父母一家十人。投於江。欲掠妾去。俄頃。髯從他舟走至。揮刀殺盜十餘人。無有脫者。妾叩頭請死。髯曰。吾非盜。乃為汝殺盜者。今汝父母讐已報矣。吾將訪汝兄弟而歸焉。脫無所歸。當為汝擇佳壻。吾義不污汝。勿怖。吾也。遂令妾入彼舟。髯獨宿蓬上。風雨雷霆無所避。所往來者四五人。相與入蛟宮。探虎穴。得虎蛟肉為脯。佐酒。四五人切切私語。不知所語云何。但見笑哭無端。或登山而觀天象。歸舟不樂。取酒大醉。醉復大哭。妾不知為何如人也。語畢。髯持酒脯至。大巖迎拜曰。吾有目不識異人。遂相與共飲。飲酣。髯曰。萍水相逢。一言為驗可乎。君雖有文。無科甲相。無子以兄子為嗣。兄子亦無祿也。大巖拜祈曰。貴賤命也。得一子承祧。窮約所甘心焉。髯曰。無能為也。忽蹶然起曰。君有子矣。吾舟處女有福相。知君表偶。可配為繼室。此女當生五男。以君相孤。止得一男。今日良吉。言為君成之。即呼女郎更衣取酒。合卺成禮。悉以前盜所劫千金歸焉。大巖既婚。思歸。髯一人自挽舟。送至九江。辭曰。天下將大亂。君其入山自愛。吾亦從此逝矣。大巖夫婦牽袂苦邀之。不可。絕袂覆舟而去。不知所之。其後大巖所嗣兄子果夭。所娶舟中女果產五男。前四子殤。惟季子存焉。嗚呼。自中原鼎沸以來。天下之無人也久矣。使得如髯者起而救之。甯遽至此哉。然如髯者。朝廷雖得之不能用。雖用之亦不能。

竟也。君岐又言近有人自海歸傳髻在海中倡義旅有功尋棄去入山辟穀不死。曾見其披髮仗劍於武夷絕頂蹈空如飛者是耶非耶。倘所謂神龍不見尾者其信然耶。

僧雪裘傳

稱雪裘不知何方人亦不自言姓名。國變後所過題壁稱雪裘子。遂呼之為雪裘。雪裘不誦經不持戒。瓢笠蕭然獨行踽踽於江楚閩粵間。遇故人贈以百金令其住山。情行者荷負相隨行者竊負而逃。絮衣裘葛冬夏互用而意氣豪上談諧笑傲旁若無人。有贈以錢布者盡以沽酒飲必極醉。醉必大罵罵已必撫胸慟哭。所寓多在村市。與近市儒生樽酒談文終夕不倦。及拂其枕席則皆淚痕也。好為七言律詩。撿奇扶輿喜用險韻僻事。見者驚為剽獲。而雪裘全不經意。醉後走筆頃刻數十首。有如宿構所遊之地。詩必盈囊。臨去捲為大束以付酒家。曰與爾覆瓿。有持其覆瓿詩示余者。余誦之終卷不知其所感何事。所指何人。但見其悲酸沈痛如猩啼如猿號如怒濤崩石如淒風慘雨。知為英雄失路搶地呼天無可奈何之辭也。嗚呼噫嘻天耶人耶胡為使彼至於此耶。乙巳秋八月余買舟將下西昌解纜之久雪裘來訪出袖中古體一篇端硯一方贈余談笑甫洽惆悵遽別遂至雲陽訪劉安于於舊官某中。

丞家值其聚飲。安于挽之共飲。巨觥屢進。竟不與主人交一言。而把安于之臂。語不可休。酒罷。忽指堂上所懸壽軸。熟視主人曰。誰搆此文。妄以忠孝許君。君亦儼然妄受。顏何厚也。主人以安于故。忍怒佯笑曰。長老醉矣。遂辭去。入益陽。竟抵郭天門先生家。先生一見。即抱頭共哭。促膝細語。語罷相持又哭。留連三月。贈以金。令游衡嶽。下武當。自是江楚間無復雪裘杖屨矣。郭氏子弟問郭先生雪裘何人。先生默不應。再問。強答曰。雲間陳臥子。其故友也。復問其州里姓名。先生又默不應。吳人戴翁客永新。自言識雪裘揚州興化人。姓李名仕魁。崇禎壬午舉人。累世通顯。曾王監國時。受翰林院官。余未之信。乃託新安友人滕公刻詢郭先生。先生督江右學時。余家前拔。而公刻則先生門客也。及見先生粹然問曰。前日興化李翰林。今安往耶。先生亦默不應。自是竟莫有知雪裘者。

賀子曰。余嘗聞雪庵和尚事。以為奇矣。豈意三百年後。復有奇人如雪裘者哉。抑更有奇者。余友劉巨溟。國變後。出亡十年。有見其披緇在曹溪者。把其袖三呼之。瞠視不答。而吉水劉裴公言其鄉人有縣吏齋公文入廣東。又寓於古剎。見一僧挑盞飯歸寺。憊甚。解衣揮汗。憩坐石上。其貌絕肖吉水舊令沈公石臣。吏駭之。試叩首通懇。勲僧袒避入內。良久不出。則已腰包潛遁。急追不及矣。沈石臣諱中柱。浙人。崇禎庚

國朝文匯

卷二十

十四

國學扶輪社印

辰進士作吉水縣令。廉能為吉郡之冠。與余聲氣相求。頗洽。國變三十年矣。道阻且長。不知其出處何狀。未敢傳疑。然此蓋飯僧則高人一等矣。嗚呼。彼何人者哉。

趙盾論

周篆

騎虎而不下。虎必患之。欲噬甚於路人。騎者知虎之憾已也。欲從而殺之。亦必甚於路人。及其子若弟拔劍而起。脫之虎口。則又從容指顧。漫言非我殺虎。彼實有然噫。孰騎之。孰欲殺之。孰之子弟殺之。孰使其子弟殺之。不待知者。知其有在矣。趙氏自文公返國。漸執晉權。至盾而日熾。是以晉人畏盾甚於畏襄。襄公即世。盾不思輯睦羣臣。正色以輔太子。而首開異議。背君命。抗夫人。排賈季。而遣先蔑以迎公子。雍於秦。彼先蔑亦惟盾指揮。雖以林父之忠言不見納。則以晉之權莫出盾右故也。卒之晉國之難。不發於外。而發於內。不作於諸大夫。而作於趙氏。則所謂欲立長君之說。乃其託辭。非實情已。無故欲廢之。不得已而立之。靈公其安乎。公不安而盾安乎。霍光謹慎過人。祇以昌邑之故。芒刺宣帝。況幾被廢者哉。非公殺盾。即盾弑公。盾內不畏公。外不畏敵。敗秦之後。無纖介之患。斯時也。盾甚安而公甚危。所以處心積慮。必欲甘心於盾。豈盡為強諫哉。無如公權不重於盾。又虐而寡謀。前後左右。無非盾之私人。是以一不得志於麀。再不得志於獒。終不得志於伏甲。於是公謀露而盾亡。盾亡而穿弑。穿弑而盾還。謂非盾意。其誰信之。不然。穿之用晉。不專於盾。桃園之攻。何以適當靈公享盾之後。盾未越境之時。不然。靈公之謀。彌明何自知之。獒亦豈明所

得擅殺不然何見責於董狐而覲據上卿終真穿不問司馬昭尚斬成濟自解而盾并不究桃園刺刃之人是以春秋正名定罪書趙盾弑其君學者背聖人明如日星平如逵路準如權衡繩墨之經而徇微拾會粹要刪未純之傳亦見其惑也禮曰臣弑君凡在官者殺無赦然則弑君之名必加諸有殺無赦之人假使董狐力能誅盾必不僅聲其罪為殺無赦而復予之以赦不殺明矣說者又因盾復見於經謂其非弑夫春秋千古爰書也殺之於前赦之於後此後世庸主不平之刑非聖人之所出也萬一異日者盾復先藉而篡晉豈得因其不當復見遂沒而不書與余故為之說曰靈公曹髦也董狐者魏之陳泰也穿者賈充而穿之衆則成濟也盾司馬昭也騎虎者也知憾己者也欲殺甚於路人者也使其子弟拔劍而從容指顧者也

淮陰侯論

將在軍雖未對壘必不令人入其壁而奪之兵欲入其對壘之壁奪其臨敵之兵雖施之庸人未遽得志況名將乎入之奪之又易於探囊捷於反掌則非但不可以為大將并不可以為裨將矣彼善將將者顧始終任之卒以之得天下其故何也夫條侯治兵孰與淮陰孝文論將孰與高帝條侯能不入孝文於軍門而淮陰反使高帝得至帳下孝文知霸上棘門皆為兒戲而高帝反不以可襲病信是淮陰治兵不及

條侯而高帝論將出於孝文下也。殊不知淮陰之所以輸誠於漢。與漢之所以重任淮陰者。俱於是乎在。非淺見之士所能臆度也。夫信以亡命一夫。一旦起自卒伍之中。立於諸將之上。所統之卒。既出於一時募從。及關中所發子弟。而自曹參以下之步將。灌嬰以下之騎將。皆帝所親信。彼見帝至固已開壁門而待矣。違侯信臥起哉。所以當時淮陰亦有未能拊循士大夫之言者此也。且君有常尊。將非久擅。是以條侯能使其惟將是從。藉旅如淮陰。敢謂不聞天子詔。而以此追罪其將士耶。斯蓋淮陰明知己之軍。惟漢王為能馳入。惟馳入可堅漢王之心。雖馳入而漢王必不疑己之不善將。彼高帝亦明知非己莫能馳入信軍。惟馳入而信始為漢用。雖馳入而亦無損乎信之用兵。此其故。信不敢言。帝不欲言。默會焉而已。千載之下。不能窺測其隱。反以此疑信之疏。不亦淺之乎。視信淺之乎。視高帝與。

主客

家居曰主。來往曰客。寄於人為旅。久滯而無歸者。謂之羈客耶。主耶。羈耶。旅耶。我皆謂之客。而不以為主耶。就是無主。就是有主。知有無之主。斯為至主。子旅主謂子羈客曰。子謂我主也耶。當我無我。就為無我。我之無我。我不得而主也。當我有我。就為有我。我之有我。我不得而主也。有我無我。非我自主。而敢謂子客耶。雖然。我既無我。

不使我無。我既有我。不為我有。是必有主。我於有無之先者。由是觀之。我與子與人皆客也。旅也。羈也。非主也。主我於有無之先者。主乎天地陰陽。今古者也。不知此者。是謂勾吳。何謂勾吳。昔者楚詆越為蠻。越亦蠻楚。相與關於澄江之側。勾吳人過而解之。左其手曰。爾居江茅蹊竹之間。蠻孰過子。而可以託人。右其手曰。越誠蠻矣。子楚人也。何獨非蠻。是故越亦蠻也。楚亦蠻也。勾吳人蠻楚越。而忘己之為裸國也。鼪聲子遊綠陰氏之庭。綠陰氏之庭多蟻。鼪於是伍。於是鼪聲子蛙目而睇。鶴翅以舞曰。嗟夫。四海一家也。爾我一蟻也。我非蟻。故能蟻蟻。然則遊塵之外者。亦將蟻我矣。

焦僥

焦僥之長。不過三尺。舉其類而比之。又有長者短者。間以寸。自偉以為丈夫矣。由阮翁仲視之。咸不出乎具脰。天下孰非焦僥乎。逞喜怒以蕩其情。縱逸慾以淫其性。而且鬪其巧以謀利。窮其智以保位。外其實以邀名。夫孰非焦僥乎。故自以為智者。不知其已愚也。自以為得者。不知其已失也。淫於數者之中。而又辨其若為賢若為不肖者。焦僥之長也。焦僥無以一乎短長。俗士無以與乎大小。是故有大人然後有大。小。不聞李斯之語東陵侯乎。李斯曰。我聞防風氏之骨。專車長狄。僇如身。橫九畝。阮

翁仲一食而盡粟一石肉百斤。夫穀之興弗勝載也。飲於河水為之涸。此亦可以為大人矣。東陵侯曰。斯之大固以外哉。形骸何足以當之。夫大人者。遊乎道之門。寢乎德之根。故全其真。彼夫紘紘何可以倫。江英子患疥。癢然益然。手足攣然。厲癰腫。然弟子曰。嘻。何不樂也。飲食無乃廢諸。江英子仰而嘯。俛而唏。曰。子疥疥。夫疥疥而不知人疥。人疥而不知天疥。夫疥乎情者。喜怒是已。疥乎性者。逸慾是已。利疥。庶人者也。祿位疥。卿相者也。聲稱疥。道德者也。其為癰腫也大矣。所廢直飲食哉。子將惡乎藥諸。且我於此得大人之道。而知之乎。夫疥之中有蟲焉。以膚為天。以肌為地。食膏飲血。以為五穀。以旦夕為終古。以一疥為四海。洋洋愉愉。以為物莫我若也。見蟣螻而笑之曰。我處乎天地之間。食五穀之甘。極終古以曠觀。遊四海而迴旋。固有以全我天。汝寄生乎蚊之顛。而惡謀乎安。然則不自知者。疥之情。故以所得矜。

書柳宗元傳後

年少而才高。則必自負。自負則必思用世。思用世則必輕進。輕進則人忌。忌則謗生。以疎遠輕進之少年。為忌者所謗。而能得位行道。未之有也。一旦廢棄。雖深自愧悔。欲改其所為。卒不得奮。於是悲憤牢騷。困厄以死。亦足悲已。賈誼之才。特出西漢。然年少而人輕之。不容於時。不然。誼何如人。而終其身於一傳。子厚有誼之才。陷於叔

文之黨為世所嗤。夫欲大用於世。何但取旦夕之效為。故以子厚之才能優遊持重。功業必爛焉。可述為唐名臣無疑。顧不能遼緩之俟其自至。恃才輕進為忌者所中。一蹶不振。委棄南蠻。豈非子厚之過歟。雖然。人惟無才。有才而自棄。與無才同。古來有道之士。深藏不售。沒齒而名不稱者。何可勝數。故子厚之進取不足深怪。且趙衰因勃鞞而用。王允因董卓而興。彼二子者。人猶至今稱之。子厚雖不自外於叔文。然未嘗妨賢害能。殃民蠹國。當日如皇甫鏞朱異之徒。皆非叔文之黨。而為禍甚烈。人於子厚獨無恕辭。亦過矣。厥後子厚行誼卓然。著於柳州者不一。我於贖質子見其仁。易播州見其義。講學明理。有君子之風。蓋與少年輕進之日。已大異矣。當事者不能棄瑕錄用。子厚雖有奇謀異術。忠君愛國之心。亦無所施。豈皆子厚之過歟。蘇轍程顥諸子。亦有黨人之目。當時皆以為賢。子厚乃負謗終身。真有能辨之者。此子尤為子厚痛也。輕進者慎。無蹈故轍哉。

秀水張氏雙節傳

彭孫貽

秀水諸生張三錫妻許氏。儒家女也。三錫執經於其父。其父賢之。以女妻三錫。許氏孝而賢。常刲股療姑疾。居數歲無子。媵高氏。有二子。雋發雋升。乙酉。三錫攜室避兵。相家蕩。所在盜遽起。盜窺三錫所挾貲。三錫弗悟也。時時語侵盜。盜劫其貲。縛三錫沈諸河。許氏將殉之。高氏止之曰。二子在。未可以死也。許氏挾二子與俱。亂而免。盜聞之。圖并殺二子。許氏急藏三錫骨。攜二子遁入蘆區。依仲子以居。遂得全。張之貲既罄。二氏紡織窮日夕。僅足餬其口。亂既定。廉得盜攜二孤哭懇備兵。使者佟公國器。檄司理韓公充美收盜。竟抵法人。咸稱許氏之智也。能全身以立孤。終乃報之。夫君之於臣。夫之與婦。其義一也。國危君死。食君之祿者。能委身一致。無所改事。亦已難矣。能死之。未必能報之。死之易而報之難也。況出於二女子乎。卒也捍大患。報大仇。可謂智勇者乎。夫亦激於義。則其勇生焉。斷於勇。則其智出焉。非智勇之難盡於義者之難也。斯二氏其全也。許氏復為二子拮据。皆受室。凡十四年。而許氏歿。高氏教二子有成。雋發有名。諸生聞雋升。經營治生以養母。益擴其先業。又十餘年。高氏年已五十餘。人咸稱二氏之苦節。一死一生。皆不愧亡者於地下。列狀上有司。學使者李公廷桂采之。表其閭。鄉先生咸為詠歌贊頌其事。貽因二子之乞言。樂得而紀。

國朝文匯

卷二十

十八

國學扶輪社印

之。夫委身盡節。士君子之高行也。報仇以立孤。俠烈者流所難能也。二氏抗節於流離險阻中。既全其身。復全其孤。終使鎖其仇。以謝所天。可謂奇矣。且夫易代之際。天家之嬪御。王侯之姬姜。流落人間。衣冠子女。纍纍隱忍。以就俘畧不少也。張氏在寒畯之門。二氏咸保其全節。不又世之所希覩者乎。表之曰雙節。宜哉。

國計論

蔡方炳

財計之係于國也重矣。但利權宜合不宜分。利源宜公不宜私。而卒未有明乎其說者。何也。夫斂散及時。出納由己。此利權也。若十羊九牧。徒費事功。則彼此不通矣。視人猶己。損上益下。此利源也。若邱夷淵實。不知本末。則上下俱困矣。嘗觀周禮一書。半論理財。而其權特重于司會。如職內職歲職幣司裘掌皮。均之為理財之官。自宜屬于太府。而一唯司會主之。蓋會計之權重。而後糾察稽攷得行於諸府也。斯周人所以為善理財也歟。漢自高祖立法。舉天下之財賦。盡入于治粟內史。而有計相以總之。尚書以會之。計簿之職。何其嚴也。自計相不再除。尚書無專責。于是計簿祇成具文。雖督責三公。檢其欺謾。然終不能得其奸也。唐自太宗立法。舉天下之財賦。盡入于左藏太府。而有比部以檢覆之。殿院以臨莅之。度支以量出之。總核之計。何其詳也。自假取憑于豪將。幣藏司于宦官。而徵斂無度。計簿徒存。究觀黃龍之詔旨。反覆杜牧之罪言。豈非痛感于時弊而為是言歟。在宋則四方貢賦歸之三司。凡計司衙司磨勘司之官。皆其所統。外而轉運內而幣藏。皆其所察也。自元豐改其官制。而若簿籍若積貯。咸不隸于三司之稽察矣。在明則四方貢賦掌之戶部。凡諸部諸寺諸監。皆得按其盈虛。以至為存留為起解為撥補。皆得操其贏縮。自軍興急而邊鎮

之疾呼。司馬之督遣主兵者動以誤餉之罪責司農主財者自不容以出入之數衡民力矣。所謂利權宜合不宜分者此也。若夫周禮之有司書也。漢代之有主計也。唐之度支宋之會計。明之黃冊也。其生齒之籍圖地之宜調度之多寡賦收之厚薄其名其色其物其數莫不備具。非好為籌畫之繁而區區于銖積寸量之利也。蓋欲通天下有無之數起人君仁儉之思使入之多于出則知其無妄用之失出之多于入則知其有輕費之弊故不加賦而足國用漢之所以自敝也。增羨財以避徵文唐之所以自敗也。勿以充溢生侈心宋之所以盛也。專以加派浚民命明之所以亡也。所謂利源宜公不宜私者此也。第富國之說英主之所樂聞而謀利之臣貪主之所樂用故有武帝而宏羊進矣。有肅宗而第五琦見有德宗而延齡相有憲宗而鍾異寵矣。有神宗而安石專矣。是皆非大無道之君而侈心既生則好利好利既切則剝民及至海內凋耗國勢分裂有隱受其病而不覺者有身被其禍而終不悟者悲夫悲夫彼其一念之恭儉所忍無幾耳而福至不可勝盡一念之淫佚所獲無幾耳而禍至不可勝言殷鑒非遙奈何忘賤貨貴德之旨而使言利之士得起而中之乎苟能泯乎耽慾黷貨之念則常賦之外不必別立名色以徵斂之上供之外不復希冀進奉以宣索之筭計者亦得體軫恤之慈布寬裕之政而仍重其職久其任自不至以

籌算為迂圖而視財穀為緩務也

錢幣論

聞之錢者泉也。如水之行地。不可以一日止。此非獨上下之相通。而亦盈虧之相乘。若止而不流。當名之為池。不得名之為泉矣。故天下財貨。合于道所自然之符者。無如白金。而獨患其不給于用。不得不以錢佐之。第欲易飢不可食。寒不可衣之物。為布帛菽粟之用。非藉馭富馭貴之權。不足以奔走役使乎天下也。夫聖人之大寶曰位。因位以制權。因權以制用。故又曰錢者權也。昔漢文之寵鄧通也。曰吾能富之。賜以蜀山之銅。而鄧氏之錢滿天下。彼其竊一日之權。尚足以萃四海之貨。況以萬乘以自振其權。可勝用哉。然古之聖人鑄金以救民于水旱之餘。不過因民之所利。為貿遷有無之藉。自太公立九府圓法。而國之經用資焉矣。既單穆公肇子母之說。後世于是有輕重之制。有直當之法。如周景之大錢。秦始之下幣。漢之為英錢。為八銖。至輕之為三銖。重之為半兩。惟漢武五銖之式。多不加輕。少不加重。其制久而無弊。他如蜀之直百。吳之當千。愈變而愈重矣。晉之四分。沈郎。宋之菜子。符葉。甚而曰鷲眼。曰線環。愈變而愈輕矣。此輕重迭更之弊也。若元嘉之制。以一當兩。赤仄之制。以一當五。乾封太平之制。以一當十。赤烏大象之制。以一當千。乾元之制。徑寸者當十。

而寸二分者當五十。夫天一地十。生成之數既定。累一至十。累百至千。秩然不可躡等。如舉一而可以當十。當千。則天地生成之道息矣。況一寸之徑與寸二分之徑均之為錢。何若是其差別耶。此直當迭更之弊也。彼其時雖輕重直當之不同。而其權未嘗不操之於上。奈何聽民自鑄。始於章帝。放鑄之議出於九齡。縱弛禁匪遙。未敢以其法為然也。自宋迄明。鼓鑄之地最廣。鼓鑄之數最多。錢之流行亦最盛。而錢弊日滋。推原其故。非患錢之不行。而患錢之不繼也。非患于真錢之難行。而患于偽錢之錯行也。非患錢之不行於小民。而患錢之不行於公上。而因以不行于小民也。夫錢之所以不繼者。由銅少也。銅出于山。固有時而竭。然亦由泄之者衆。與耗之者多。東南高艦大舶。所來者皆詭特之物。而以中國之銅市之。以有用易無用。泄之於外境。一往而不復還。又家人之器具。浮屠之佛像。鐘鼎其耗亦復不貲。誠一切禁止而歸其銅于上。非獨絕私鑄之路。而銅饒則錢多。此一法也。偽錢之得以錯行者。由惜銅而愛工也。人情趨利。若水之就下而不可止。以一倍之銅。獲數倍之利。嚴刑督之。固已不止。利可必得。刑不可必得。即得之有獨害。猶有獨利也。今能不惜銅。不愛工。而又操事於至平之間。錢千文。權白銀一兩。計其本亦畧相當。其稍贏者為官工之費。則民亦安所利而為之。而奚俟夫厲禁乎。且私鑄者利其錢之行。而受錢者利其

錢之遞行。吾之錢輕且濫。惡而直。又與公上等。則受錢者謂直等耳。必不受輕且濫。惡者以自困。而私鑄者為公上之錢。不可以得贏。不為公上之錢。且復不之售。而私鑄者絀矣。此又一法也。錢之不行于公上。而因以不行于小民者。由出入之不齊也。今天下一家。尊在一。人雖州縣異名。已不如上世各私其國。僅以一國之物供一國之用之勢。地無不可至。物無不可通。小民亦安有不願行者。而往往以不行之咎。責之賣菜之傭。荷擔之子。不知行法令者。當自貴近始。豈惟貴近。自朝廷始可也。誠能於田賦戶賦。則兼收錢穀。商稅例課。則純用收錢。賜予祿養。則銀錢兼支。市易工役。則惟錢是用。此謂自朝廷始。而上下交會。血脉流通矣。此又一法也。嗚呼。穀粟布帛。民之司命也。然生之有時。阜之有地。成之以力。既不可以易得。且千足為貨。事難于懷璧萬斛為市。不易于越鄉。惟錢之為物。出于山而無窮。出于人主之口而愈無窮。轉于小民之室。輕可挾而細可分。得朝夕贍其所求。而更不可勝窮。特錢不能自為用。因民之急與上之力。而後有具用。錢不能自為輕重之體。合己身之多寡與萬貨之盈縮。而後有其輕重之體。是因民之急。而後君上之權可行也。致萬物之盈而不縮。而後錢之多而不寡者可御也。此所謂泉也。而法以佐之。所謂權也。至若交子之法。出於民之所自為。而託之於官。且特以佐鐵。非所以佐銅。可以行於蜀。不可以行

國朝文匯

卷二十

二十二

國學扶輪社印

于四方。即蜀亦奈何。可經久行也。非獨交子不可以佐國用。即楮鈔亦不可以佐國用。何也。鈔者。全乎人主之權。而于人情物情俱有所不合。况一經折閱。或至泥爛。即不可復用。始以值千文者。究至不值一文而止。此末世罔惑斯民。以濟一時之乏者也。于利權何當哉。

校刊朱子大全文集書後

論人者。必取其平生之言考之。而其人見焉。况乎接往聖之宗傳。垂後學之標準。如考亭朱子者乎。今儒者童而習。長而遵。莫非朱子之言也。習之遵之。而聞道之人。蓋寡。則又何也。朱子之學。有體有用。合內合外。溯流以窮源。即末以知本。教固因人而施。詣亦與年俱進。朱子之為朱子。未可淺窺而得也。以其博綜羣詠。反覆講究。精研體認。求合聖賢本旨之苦心。不得以朱子為依文解義也。至于信道之篤。求道之勇。踐履之醇。涵養之密。持守之嚴。經綸之裕。出處之正。靡不造其極。而幾于無間。後之人。非朱子而朱子。不加損。尊朱子而朱子。不加益。徒多其辭說。以起紛爭之端。皆未讀朱子平生之言。以見朱子之為朱子焉耳。朱子故有大全文集。歲月浸久。版磨滅。其書不槩見于世。竊嘆吾道一缺陷。事道余友臧子喟亭。具有同心。相與竭蹶從事。始丁卯秋。迄己巳春。告竣。原集一百卷。又續集十卷。別集十一卷。具有續有別者。蓋

集既成復搜採得之故另附于後初無所分別於其間余竊慨是集不出朱子手定又不由入室弟子所編輯惟片言必存而統之以類又未嘗就類而編之以年致使後學莫尋其言之先後而為多歧所眩定為晚年者或未必盡出於晚年然多聞記誦大都是少壯精力有餘時功夫若晚年進境未有不去泛濫而歸緊要去安排而歸灑落者也即以吾輩讀書行己處驗之自知乃故反之而指為初年未定之論似亦失之矯誣余鈍根盲識未窺朱子之藩籬况前人且未能攷據編輯余何敢妄有更定故悉依原本即續別二集亦未依類附入惟字畫魚魯之訛則正之苟屬疑似甯仍其舊聊存吾兩人慎重不苟之意云爾天下後世精心以求之徐思而自得之以見朱子之為朱子不惑於紛爭之論而相期為聞道之人斯集之有繫于吾道豈小補哉

書韓中丞世琦蘇松減賦疏後

予讀韓公減賦一疏而不禁為萬世吳民額手也按吳中為古揚州之域厥田下下而今于海內稱上上焉夫同此土壤也何昔瘠而今沃若是其不侔歟間攷之傳記知吳地殷富之名蓋自錢武肅王時昉也何也武肅時中原鼎沸獨吳地藉武肅保障之力晏然無事由宋迄元殆數百年不罹兵燹矣生聚久遠故人民繁庶初不由

地力之豐與物產之饒所致也。況乎今之所指為殷富者亦第以商貨雲集煙鱗遠而言究則浮而不實有文無質若糧稅出自田間則壤成賦相去不遠矣。至今昔頓殊而且較接壤之常州賦額獨倍哉。夫明太祖平定天下獨吳民為張士誠死守抗明師最久城既破將盡屠其民劉誠意言吳民必不反何必盡殺不若重其賦以苦之載在平吳錄等書班班可考誠意進言特以救數百萬吳民之命出于一時之權宜豈意重額示懲遂為三百年相沿之成例小民終歲勤動而輸于官者十居七八加以水旱不常軍興浩費額外浮派苛斂耗贖橫肆鞭笞民之所存無幾故貧不聊生之狀難以圖繪蓋自明末而已然矣況田之所以為下下者又非無據也他省之田歲皆雨熟吳田止有一熟其有稻一熟麥一熟者惟高田則然水田大都不堪種麥麥亦不能多收較之兩熟者上下懸絕而猶以吳田為膏腴不具冤乎九州蒼黎莫非朝廷赤子何忍循前代之虐以重困此一方民故趙按君言之于前今韓撫軍言之于後非實見東南積困如苦莫訴奚為而出此救焚拯溺之謀但成例難以驟更而又當蠲赦頻頒國計告匱之日機尚有待將來兵戈偃息帑藏充盈睿聖仁慈曠然為吳民解倒懸之厄免剜肉之慘或得如宋初王方贊更定吳中稅法每畝出米一斗或得照常鎮額例一體供輸斷以此疏為基始矣。

書韓中丞世琦省存餘耗疏後

嘗聞漢臣不加賦而國用足之語與唐史進義餘以媚君上之事每訝其不倫而猶幸近世無此舉動今讀韓公請免省存餘耗一疏乃知人臣心術不同古今殆如一轍也夫糧之有耗朝廷明禁之旗丁陰索之方且禁之不能而忽明開一例曰有旗丁勒索未盡之餘耗可佐司農軍餉未足之急需旗丁聞之將執此為例曰糧之有耗朝廷實聞之非私也于是耗贈幾同正供可以勒索而無忌憚設更有州縣額外加徵亦得援以為例曰朝廷固取省存之耗矣則所謂禁勒索禁濫徵止成具文而已原夫始事者之心豈真採漢臣遺意倣唐史餘風乎特未深思其害焉耳予因是而推之如役田花利也學租銀兩也並徵充餉矣亦曾思二項田畝所始乎因差役煩重于里中富人捐資置田公收租米除完納正供外以田中餘利津貼里中役費誠有合于富者輸財貧者輸力之義今乃以役田花利歸之公家在承役者津貼無資固已苦矣而每畝需納花利銀七錢一畝所入完去糧折安得有七錢之餘里中歲歲賠累遂以昔日好義之人為罪府謂蘇吾困者適以重吾困者也學田之始亦當日上臺有司敦崇學校置田收租除完納正供外以田中餘利為修葺考課之需并以助給諸士之極貧者後人不體此意徒飽蠹腹則清理之俾復舊制可也即不

然猶贏羊空存可也。今亦徵學租以入公家。學役不能賠納。勢必取盈于佃戶。佃戶畏累則棄田不耕。田不耕則不持學租無辦。而正供亦將缺額矣。夫舉一事必當思其後。日之為民害與否。且當思此項所從來。果為公家當取之財與否。使為公家應取之財。久當入之額賦。其不入額賦者。皆非公家所得取也。特因司農仰屋之時。故言利之臣。進此多方撙括之術。得韓公以救其誤。

聖明在御。仁政旁流。當不惜幡然反汗。必且有繼餘耗而議革者。予故僭引其端。以備當事之採擇焉。

秦論

馮景

秦自用兵滅六國其兩軍殺傷相當者皆不計計其大者龍賈之戰岸門之戰封陵

之戰高商之戰趙莊之戰秦殺三晉之民數百萬而其斬首虜之可數者坑長平

斬殺四十五萬攻伊闕斬首二萬取陽城負黍及趙縣斬首虜共華陽斬首十三萬平陽斬首

丹陽萬八宜陽萬六修魚萬八石門萬六之戰又百三十餘萬自古取天下殺人之多未有如

秦者也而曰不嗜殺人者能一之孟子之言其不信矣乎吾嘗考秦得天下之由及

亡天下之速平定其功罪乃知功莫大于不淫罪莫大於好殺何也春秋列國之君

以好色荒淫殺身亡國者不可勝數奪人妻孔人女宣淫于朝烝報于宮其禽獸行

之尤穢者衛納子婦齊通女弟新臺嚴荀狐綏之詩聖所深誅垂為世戒而秦之諸

君有一於是乎始秦用戎俗男女無別孝公大變之令民父子兄弟同室內息者為

禁此興王之本也桀放以末喜紂殺以妲己幽滅以褒姒夏書曰內作色荒末或不

亡秦由是道世守弗替卒為天下雄故即后有爽德而君無陷淫雖以始皇之剛戾

而於巴寡婦清則客之特為築臺表貞則其治之所尚可知矣刻石會稽之頌曰防

隔內外禁止淫泆男女潔誠夫為寄緦殺之無罪男秉義程妻為逃嫁子不得毋咸

化廉清六國之君未有及此者也雖欲無王得乎傳曰貪色為淫淫為大罰蓋淫之

罪浮於殺矣。是何也。殺人者賊其一身而止。淫則僇辱及其人之三世焉。然則秦所以得天下。由於不淫。非嗜殺也。光武至邯鄲。劉林進說曰。赤眉今在河東。但決水灌之。百萬之衆。可使為魚。光武不答。去之真定。不嗜殺人。果一天下。秦唯嗜殺。乃其所以速亡也。孟子不云乎。由其道不變。雖與之天下。不能一朝居。此秦二世而亡之效也。其言信。

范增論

蘇子瞻論范增之去。當於羽殺卿子冠軍時。吾意不然。秦所以速亡。鉅鹿之戰也。戰鉅鹿而勝。羽將之也。羽得引兵疾渡河。九戰而大破之者。殺卿子冠軍而代將也。不殺宋義。則羽不得將。羽不將。則鉅鹿之戰。必不勝。戰不勝而秦亦不速亡。當是時。楚兵冠諸侯。其興也如火。焰焰增曷為去哉。且宋義之不能軍也。審矣。久留安陽。不恤士卒而徇其私。此其當誅也。微獨羽。雖沛公亦必斬其頭於帳中。亡秦之機。實決於此。故君子於殺宋義事。皆為羽功。不為羽罪也。史稱增年七十。好奇計。吾謂增老悖人耳。凡為羽計。皆左何也。沛公來鴻門。止從百餘騎。而餘兵在新豐。號稱百萬。此何異一跛牂入羣虎之穴。其滅也易。增果能用奇策。伏萬弩於鄴山芷陽間。沛公間行將安逃死。明知君王為人不忍。而顧欲坐上擊之邪。一夫擁盾入軍門。交戟之衛士。

不敢止。五人間行至霸上。百萬之衆不能防。沛公君臣一出。一入。如履無人之境。安在增能奇計也。然則增宜何時去。吾以為當在新安阮卒二十萬人時。羽逆天道。失人心。垓下之亡。職此矣。甯有嗜殺如羽而能一海內者乎。沛公嘗曰。項羽有一范增而不能利用。所以為我禽。吾謂雖用范增。無救於敗。增即不去。羽亦必亡。是不能當陳平。矧敢望三傑也哉。

讀柳子

予嘗讀唐書。觀王叔文之黨。所謂八司馬者。皆天下才子也。而陸淳劉禹錫柳宗元為冠。柳子之才尤奇。其位最顯。名最下者。韋執誼耳。韋之才不及柳甚遠。特以蚤附叔文。最先引用。居相位後。迫公議。時時有異同。遂與叔文敵讐。彼執誼且然。則柳子之不為黨人用。斷可知也。今以柳子之才。肯附叔文。同中書平章事。豈足道哉。史第言八司馬為黨。卒無一事可實者。其黨之罪。以斥劉柳者。既以黨得罪。尚欲以柳易播。是其同道為朋。不以黨為諱也。且夫叔文固小人。然素自愛。其過在專權自用。欲誅宦官。強公室。反為所勝。被禍耳。亦無他殃。民誤國之罪。觀順宗實錄。如罷宮市。貶李實。停月進。出宮女。禁五坊小兒。遣教坊女妓。焚容州所進毒藥。委常參官各舉所知。及敘用姜公輔。蘇弁。鄭餘慶。陸贄。陽城於貶所。史皆稱其人情大悅。而叔文侍東

宮時自言讀書知理道。乘間常言人間疾苦。順宗將大論宮市事。叔文說中上意。則其人機辯。亦非無深識遠慮者可比。因言某可為將。某可為相。幸異日用之。然則劉柳無求於叔文。而叔文引劉柳以自重。此則情之所有也。奈何後世君子不察。遽斥為黨哉。顯宗得其錄。繫治數千人。如尹興。陸續。梁宏。駟勳輩之所連及。率一切陷入。無敢以情恕者。凡僉壬將大有為。必陰疏天下名士。漢楚王英謀逆。陰疏天下名士。以自助。事敗而及焉。所謂楚國亡。獲禍延林木者也。幸當時大賢如陽亢宗。陸敬輿。皆未聞詔而卒於貶所耳。設為引用。亦誅二公為黨人否。在當日有所拘忌。不得不深排而力詆之。今已千載。猶爾邪。宋子京作柳子厚傳。言眾畏其才高。憊又復進。故無用力者。今讀貶永州後與人諸書。既不文過。又嘗自訟。此君子引咎傷痛之詞。則然而後世且據以為口實。嗚呼。小人論古無識。亦見其好議論不樂成人之美如此也。今其文自在。千古學者。果平心易氣。讀其書。又觀其行事。沒且為明神而生肯為姦黨哉。

贈吳征吉序

蕭山吳子征吉。以本富。鳴於邑者八世。世世樂善好施。吳子高識尚義。喜結客。四方士至其邑。必以吳子為歸。襄子渡江訪金明府。因主其家。恨相見晚。吳子盡見其邑。

豪俠咸交口推吳子賢而予尤多其救災捍患保全鄉里之功也。曩癸酉甲戌間浙東荒於旱。時紹興守有移杭倡賑之說。於是山會虞暨姚嵎六縣之餓人三千。聞風來杭者接踵而實無賑備。上下震駭。虞其來將為亂。於是杭之東門不啟。每人官給一宿菴。以兵衛趣遣歸。歸且病者半。暴者半。所過驛驛既涉西興。蕭人大恐。吳子聚族而謀曰。吾儕殫今歲儲。予餓者人斗米錢五十文。乃可以免。然止宿必以寬間之。廟飽餞必於往來之遠。此非吾族所能辦。遂投袂起。自西門號於東門曰。六邑之人皆吾鄉鄰也。今苦饑荒。失望於杭。而道吾里以歸鄉。米與錢我則予之。今夕之宿。家出薦一領。粥一盂。鹽一碟。持以餉於廟。可夜保無事。詰朝亦如之。其行也。家家囊餽峙。精於門首。自西徂東。行且嘔。不崇朝而戎毒除矣。否則難生。皆謹應曰。諾。已而餓者帖然過蕭。皆德吳子。有泣者。張中丞聞而賢之。以禮延見。欲旌其閭。吳子曰。為義動也。且紓禍非邀福也。今萬人共事而一尸其名。名之來。怨之招矣。敢辭。中丞曰。善。是田基辭賞於趙鞅之義也。吾見不及此。益賢之。噫。吾見若世之富人。牢滕固鑄其財。視人急。莫肯費半菽一毛之捐。卒亦耗其所藏。甚或聚而殲旃。如孫奮石崇者。豈少也哉。人以為富。而不知天之窮之也。何也。所貴乎有財者。為能施賑也。積而不用。反致殺身。斯不亦窮矣乎。故叔孫穆子曰。善人富謂之貴。淫人富謂之殃。而華封

人曰富而使人分之。何多事之有。吳子化多事為無事。惟其能分而遠殃也。善人富則一鄉蒙其福。又能逃實以避咎。吾是以多其義而高其識。其長保富也。宜哉。吳子曰。是年田無穫。又殫其儲。一家皆食糜。若與六邑餓人分患。然予曰。漢鄭泰結交賢豪。有田四百頃。而食常不足。張奮分損祖奉。賑卹宗親。雖至傾匱。施與不怠。史書美之。然泰市名而子市義。奮卹宗親而子卹鄰邑。又賢於公業。稱通遠矣。

山雌集自序

無象無言者天也。忘言忘象者聖人也。予非聖非天。意得而已矣。得意亦不能忘言。得言亦不能忘象。其山雌之肥乎。故曰山雌之肥。其意得乎。莊子曰。澤雉十步一啄。百步一飲。不靳畜乎樊中。神雖王弗善也。予亦樊中之畜也。神王而意彌善。何居乎。熙熙焉。皞皞焉。局一室之中。若江湖之適。無他。心大於八極也。不知我之為山雌邪。山雌之為我邪。吾有聞於楊子曰。明明在上。百官牛羊。亦山雌也。闇闇在下。簞瓢梓茹。亦山雌也。何其懼。惟其不懼。吾是以樂吾之肥。意得然。然。適誤其顛。

義士藍九廷序

丙子冬日。予行清和坊。避雪宗人藥室。有壯士睥目豐頤。長不滿八尺。而腰大九圍。敝衣穿空。望見予。腴欲前致辭。予奇其狀貌。揖以入。宗人舉手歛歛曰。公無然。此齊

人也。壯士慚懷而退。時雪霽。予乃踏街而走。追及壯士而問之。對曰。身姓藍。名九廷。山東人。少為種船篙師。南北居貨。貿易致千金。散與窮親。故立盡。隨之臺灣。今夏乘海船北歸。至四明。遭風覆溺。身攀木緣崖。得生歸。而無資。以是行乞於杭市。得三金。可抵家矣。予憐而止之宿。醪錢告同志。事立辦。九廷大感。明日將行。予夕飲之酒。酒酣。九廷拊膺歎息曰。身亦曾讀書。了了明大誼。少時卻賄為烈婦申冤。人稱義士。今不幸遭患難。飢餓瀕死。竊自念天道苟可知。決不填溝渠異鄉。果遇公獲濟。予因問烈婦為誰。對曰。徐州海烈婦者是也。康熙六年。烈婦堅拒旗軍林九功。夜穴艙強姦。自縊死節。方是時。身卻九功賄鳴官。官來出屍米中。玉色如生。相衣窮袴。皆牢綴如裹革。言未既。予離席鞠臆。酌九廷三大觴。亦自觴曰。馮景何幸見義士。吾故知君非常人。果然。且君非遭海風覆舟。予奚由見君。君亦奚由至吾前。述三十年已事。予將奮筆表君。使百世下知有篙師藍九廷者。義士則天道果可知也。九廷喜甚。罷酒就寢。雞初鳴。起篝火磨墨。索予書。書已。天亦明。九廷再拜別予去。

仁和陸孝子傳

予嘗觀吳門黃孝子端木萬里紀程一編。輒心悲之。既又為之喜。蓋孝子父含美宦。湏兵阻。孝子徒步走萬里。問關辛苦。卒尋父還里門。何其幸也。悲莫悲於仁和陸孝

子孝子名承祺字又祉。父夢蘭客死粵西鬱林。時方軍興。踰年而凶問至。承祺與弟承祚年尚弱。號慟拜辭其母王氏曰。兒不得父骸。不生還矣。家酷貧。二子晝夜走萬里。道乞食。其間疾風盲雨之所飄搖。懸崖絕壑深谿仄行之所危恐。山妖水蜮猩鼯豺虎睚眦而上下。而又有烽煙戎馬關壘譙呵之警。卒至鬱林。入鬼門關數十武。有老嫗資糜以給餓者。一子踞問父匿所在。老嫗指叢菁中云。彼纍纍遺棺。率朽敗不可問。傳聞是中有浙江人。是邪非邪。二子乃詣前。刺血滴骸。凡閱十餘棺。皆格不相入。二子拊膺叫天。哀感行路。而忽遇父故人。道棺在蕭寺。二子隨以往。撫棺一慟。皆隕絕。時聚觀者見二子死。大呼孝子孝子。急以水漿灌其喉。久之承祚甦。而承祺竟氣結不屬死矣。承祚子然。置兩骸左擔。以出。蠻煙瘴雨之鄉。兩足薰面。還家報母。母已蓋棺數日。先是承祚道遇鄉人。寄書歸。母慟嘔血曰。不意吾兒先我見夫子於地下也。既卒。哭數日。夫匱已歸。吾何戀。絕粒六日而歿。蓋景得交又祉季弟承烈。故聞之詳。其宗老冰修常為景言。睫必淫。嗚呼。誰之不死。而節孝萃一門。姓名光千古。景始而悲甚。既又未嘗不大喜也。承烈年十四。哭諸有司之庭。請祀承祺學宮。而載節婦孝子於郡縣志。如其請。嗚呼。承烈亦孝矣哉。

貞女陳三淑傳

女子許字人未聘也。所字者家以貧辭。母欲改字。卒不得。守志凡八年以死死之日。聞者莫不流涕。皆曰貞女云。女子姓陳名三淑。杭州錢塘人。武略將軍某之季女也。自兒時不喜偕羣兒嬉。言笑不苟。每不可于意。輒怏怏累日。人悅之。萬方終不敢齒。以是羣兒憚與遊。亦坐是失母。黃氏歡稍長。知讀書。竟日不倦。十歲遂通孝經。二南列女傳義。十五學作詩。率咏古史節義事。每成一篇。則坐而微吟。吟罷哭哭罷復吟。吟一再已。燒其稿。香蠟煙勃勃。疏櫺間與香氣雜。如有年。并焚其筆。不復詩。歲丙辰。杭城為採選詔言。一時嫁娶殆盡。貞女年十九矣。父倉卒用媒妁言。許字同里沈某之子煜。煜後以家貧廢業。客遊雲間。不果歸。煜之父因媒氏以辭婚。貞女不知也。時貞女父從戎於滇。母操家事。復用前媒妁言。改許富家子某。納采且有日。至是貞女聞哭不食。母勸之食。曰若是死耳。何食為。富家聞亦卒不敢顯。然布幣行禮。其後貞女父戰死無後。後其姓則貞女兄。兄賈人。惟嫂言是聽。貞女雖有妹。乃兒時素憚者。亦與其嫂兄親。於是一家之中。咸憎貞女。而前媒氏又貞女同母舅也。勸其母改字益力。母與兄決意字富家子某矣。度貞女不可。則先揚言曰。沈郎已娶。守此何為者。冀以絕貞女望。貞女聞之。被髮大慟。曰。其然兒亦不復再適人。徑起引刀截其髮。髡首以眎母。一家皆驚。乃不敢復言姻事。貞女自是遂有病也。壬戌冬。病益甚。或累

日不飲食。焚香危坐。閉目一室。家人與之語。不答。有時哭極哀。鄰人徐西冷者。俠士也。每聞垣內哭。詢而得其由。悲傷其志。乃造沈煜門。以故告。煜適歸自雲間。意陳女已嫁久。聞是說。殊不信。西冷奮然曰。女子志如是。不可負也。吾勸其母矣。若即貧邪。吾能代若備婚禮。煜唯唯。越數日。將就婚。母復為說。五不可。徐子又以事東渡江。事復寢。癸亥春二月。貞女病不起。母始以媒言招沈煜。煜乃往。其母命登樓省之。貞女方寐。呼曰。沈郎至矣。貞女遽寤。手自下帳帷。蔽面。煜問可有言乎。貞女徐曰。既有成言。何為又他娶也。煜辯其誣。貞女都無一言。惟以袂掩淚。煜睇幅巾其首。知向所傳非妄。顧貌雖瘠。膚色如玉。亦謂病可起者。煜既歸。貞女泣不已。已而歎曰。彼既知吾心。吾死可矣。遂絕食。并藥不御。越一日而貞女死。時為二月二十九日。煜既見之後。二日也。年二十有六。敝時身輕如蛻。面目猶生。胸中熱氣蒸衣外。

馮景曰。以余所聞。陳女生死一于貞。道路之人皆賢之。不虛哉。不虛哉。不更二夫。謂既字者。此獨難矣。夫家貧既無復望。其於煜亦初未之見也。而守死若是不棄其父。倉卒一言。自非大孝。孰能至此乎。煜為余中表弟。又同居。故習知其事。陳女自足傳。余為序次。使採風君子。後有考焉。

甲子秋

皇帝避暑塞外。有人衣短後無冠。跪伏道旁。大呼萬歲。

上聞止輦問之。對曰。條奏時務十二事。

上覽其奏而未半也。問若何人。對曰。臣比部郎中某甲家奴也。

上怒曰。是而所宜言邪。奴敢爾。奴敢爾。杖而流諸關外。監行伍伯路問曰。若何為者。朝中人林立。少若言邪。為人奴良苦。然猶愈於死。今烏喇得流人。繩繫頸。獸畜之。死則裸而棄諸野。烏鳶飽其肉。風沙揚其骨。且官人直言作忠臣死。即揚大名耳。若即死。後世誰知者。而乃若是。奴仰天歎曰。此而公一以欲死也。吾為人奴。雖勞苦不廢書。見今世務宜言甚多。意頗望臺省。或此月不言。必他月也。久之無聞焉。又謂今年不言。或明年。至明年復然。自今以往。不可復待。故迫而為此。吾常恐未獲死所。今若此。即魂魄不愧。創甚不能行。未出關而沒。伍伯還京師。告人如此。馮子聞之流涕曰。嗟乎。奴人者不言。迺為人奴者言邪。且皇帝仁聖。固能虛己納諫者。特不欲以一奴辱朝廷。輕當世士。其尊貴有位君子何等也。是奴。奴其身耳。儒其行。真奇奴也已。

俞老僕墓誌銘

老僕姓俞名文金華人少讀書明大誼身長八尺軀幹魁偉廣眉修髯耳長三寸許發聲如鐘為讐家所陷囚於獄吾父出之德焉委身為奴老僕性嚴未嘗見齒僑輩憚之然事主恭謹老僕析新姑茂山中爨不乏當山行遇虎挺擊之斃人勸勿再往老僕不應其婦哭而牽其袂老僕怒叱曰人生聽命於天乎抑聽命於虎邪絕袂以去時年七十矣予兒時好嬉戲老僕常柔聲規誡予易之不以介意數抽棘為矛與鄰兒十輩戰於園皆蒲伏而歸老僕有子年與予齊亦召之使戰老僕聞咎子數十予始憚老僕從此罷嬉老僕在家日少歸必問予所讀章句請誦之熟則大喜以山中五色文石獻予予樂焉每歸自塾釋書於几揖父母起居畢徑詣龜下望薪有無以驗老僕至否蓋予年十二猶數望薪老僕一夕醉進諫曰官乎此非弄石時矣曰長炎炎去成人幾何不書之愛而石是好蘭溪之石可勝既乎失時不學負老奴矣其聲益微予悲傷具意且心忤遂大奮於學然猶歸家數望薪念老僕不念石也康熙癸丑秋敝廬火老僕年七十九左擔而趨出於火中者率為人奪去惟老僕不失一物至今又十許年耄矣不能入山析薪猶自扶杖至江干問薪價低昂云老僕在予家三十八年未嘗一日病今丙寅夏卧牀不起聞予自淮歸強起謂其婦曰扶我謁相公老僕於予凡三易稱兒時曰官壯有室則曰耶予遊京師上書當塗石聞

天下。老僕嘆曰。此真相公矣。遂稱至今。蓋予自童而少而壯。老僕三易稱。而予髮亦種種矣。悲夫。六月二十六日病沒。享年九十有二。沒之日。予見新而泣。明日執爨者告市新。予益泣。斂之加禮。葬於不食之地。遂誌之。而賜以銘。銘曰。其僕則名其實。士李元蒼頭略相似。破格銘之。不必諡。

與吳湛書

顧有孝

與兄言別已累歲矣。關河遼濶。通問維艱。遐念昔遊。曷勝悵惘。然患難之來。當以心制。境不當以境役。心處處體認。則順境反不若逆境之受益矣。夫子不云乎。陳蔡之閒。某之幸也。孟子舜發畎畝一章。實發明此語。弟讀史書至勾踐之棲會稽。重耳之過曹衛。輒掀髯而笑。兩君老謀壯事。皆從此而發。因知庸庸者多厚福。非天私其人。止不屑以患難鞭策之也。假兩君遭遇昇平。沈溺勢利。雖與魯哀衛靈同其碌碌。亦未可知。今之勛業爛然。聲名蓋代。若此。拜會稽曹衛之助。匪細矣。漢槎足下。勉之。勉之。荀卿氏有言。怨人者窮。怨天者無志。願漢槎詳味其言。則目下漂流絕塞。家室流離。亦作會稽曹衛觀可耳。由此而豎起脊梁。潛心理道。以上承天意。則今日之忌兄。禍兄者。非兄之益友耶。漢槎勉之。遠大在前。努力自愛。萬里貽書。不作一世俗相慰語。不敢以世俗之人待吾漢槎故也。他日者。策蹇歸來。非復吳下阿蒙。弟為漢槎慶。即為世道慶矣。毋辜吾望也。

南華釋名

金人瑞

南華何以名華實不可說也云何實不可說本無實可說也云何本無實可說得說
卽非實也且也既已實矣又何說與且也欲以說說實而說本不實今以不實之說
而說於實可乎且也甚欲說實而都不知實則何在也謂實又別在此非實也說實
則必云實現見在此夫實現見在此吾則知之非眾人之所及也今欲眾人的知實
乃現見在此則非起大權道必無由且也實現見在此知之固難若夫知之而祈到
之則尤難也且也眾人未知有實則不得已告之曰實若真知有實又真到於實當
是時又詎真有實又詎真名實哉且也此固實也而眾人惘然莫知其為實是誠大
錯乃此固無有實也而吾噉噉然必號之曰實又豈非大錯是故經置實而言華華
者非他卽是實之所開敷也華者無他至於廢落則仍實也問有未開敷為華之實
耶有未廢落為實之華耶曰無之何故無之如有未開敷為華之實則是實在華前
如有未廢落為實之華有是實在華後則是華時遂無實也若華時無實則必華自
華實自實離實乃則華離華乃有實則必華本非實夫華本非實則實與華且無與
然則何云開敷時為華廢落時為實夫開敷時為華者從未有未開敷之時者也廢
落時為實者終無有既廢落之時者也自古如是開敷終竟亦如是開敷今日現見

果如是開數自古早已廢落終竟已不煩重有廢落今日現見本是廢落曰今現見廢落何得今日又現見開數此則有二一者衆人但見開數未見廢落故且順情亦云開數二者今雖本無開數後亦更無廢落然而今則無奈開數後則必歸廢落直待廢落此開數方復開數此廢落則雖今日明明眼見廢落且不得不口說開數說開數者所以供廢落云爾

南華字製

字非天墜地湧其製起於蒼頡厥文從密從孽者言從聖人密心中展轉孽化而出也自仲尼既沒以來其學都絕漢儒許慎雖有說文十四篇然心不知其事僅乃就其膚廓抄掇成部形似略近並就錙銖閒常取而觀之世人曉者彼亦稍通若我不知彼便缺然矣因思書之為學列在六藝七十二子並所通達豈非論道之金匙登聖之寶筏胡可徐氏兄弟匠意豐滿王家父子隨手詭詐沿習既久都忘本旨脫有能言之者則一國之人皆狂反以不狂者為怪彌日擗心竟夜啼泣聖人不作便成異國心煩體熱終竟何補故前歲長夏欲就舍下後堂開局建標延諸道士並共論撰述為童壽六書大都一百卷而遷延兩月竟亦中輟所以然者行年四十心血雖竭龜勉著書尚不敢愛獨是日夜吃吃鬚髮為之盡白而其書已成便遭痛毀不惟

無人能讀乃至反生一障是為無救於上聖而反有累於後來也今年二三學者請以夏九十日解衣露頂快說漆園遺書於諠莫辭竟受斯託話言既多詮釋略具存之未全棄之可惜則命兒子釋弓掌而記之別題為南華字製一卷此則莊氏一家之經用並非倉帝字海之備觀同學傳寫藏而讀之不可以之示人何則錦心繡口世豈真有其人哉設真遇之是彼其人必能多方購索乃至判命相要募賊來竊審若如是是真此人然後可與觀之如或不爾即是成羣而生成羣而死之徒彼不能益我書我書亦不能益彼一概與觀謂之大枉欲速流行反成陷害故須鄭重如受詛盟也

序離騷經

孔子曰作易者其有憂患乎易憂患之書也周易非以昭代立名周其體也易其用也亦可云周其用易其體也約法而論周以常住為義易以變易為義變約人法則周乃聖人之能事易乃大千之變易大千本無一有更立不定日新日日新又日新之謂也聖人獨能以憂患之心周之塵塵剎剎無不善徧又復塵塵周於剎剎剎剎周於塵塵然後世界自見其易聖人時得其常故云周易漆園氏以莊著姓而自錫嘉名曰周卽此義也若約夏殷二氏以迄於周則夏之為言大也破身見也身見不

破不名為大殷之為言中也。斷命根也。現在為命過去為根。周監於二代言其無不備也。周本西國而化行於南。卽坤卦西南方也。坤卦利利變易塵塵具足。則周仍約法之字而人亦其中。故言周必言易。言易必言周。猶離體則無用。離用則無體也。昔夏之世書曰連山。殷之世書曰歸藏。讀連讀山。談歸談藏。其中並不談周易。故不得言連山易。歸藏易也。周易如主將。連山歸藏如兩副將。不認得兩副將。則正將認不清楚。故連山歸藏正是搜根剔苗。除去了連山歸藏。便通體是周。通體是易矣。周易全是聖人一種憂患之心。迫而成書。後惟屈子離騷深得其旨。故離騷居首篇。亦得名經。準之華嚴四無礙。周易理無礙之書也。書春秋事無礙。事事無礙之書。詩及論語理事無礙之書也。故論語必叩其兩端云云。